


BUJAADIKI PA MBÛ

 Kumpala kwa twêtù kwinyika mitu bwa disambila, ndi muswe kubalakù ndambu wa Dîyi dya Nzambi. Mémè ntu muswe misangu yònsò kubala Dîyi Dyèndè; bwalu àànyi méyi ôwò neàpangilè, ôwò ngàà muntu, kadi Dyèndè Dîyi kadyèna mwa kupangila to. Nenku nwênù bàdì bènda bàlondesha bìdì bifùnda abu, ne bikwabo, tùbalàayi mu Maatàayi nshapita wa 14, dilòlò edi, biikàle tubangila ku mvensa wa 22.

Ne dyakamwe Yesu kwenzejaYe bayiidi bèndè bwa kubwelabo mu bwàtù, ne bwa kumudyànjidilabò luseke lukwabo, pàcìwàye ùpingaja misùmbà ya bantu ku mààbò apu.

Nenku pààkamanàye kùpingaja misùmbà ya bantu ku mààbò, wàkabànda ku mukùnà pàà nkààyèndè bwa kusambila; ne pààkalwà . . . pààkalwà dilòlò, yèyè ùwà kuntwaku nkààyèndè.

Kadi bwàtù bùwà mpindyewu bùsanganyibwa pankaci pàà mbù, bùtànkekajibwa kùdì mavwala; bwalu cipeepele cìwà cìbùpingaja paanyima.

Kadi pa cilù cìinayi cya bufuku ki Yesu kuyaye kùdìbo, wènda wèndela pa mbù.

Kadi bayiidi pààkamumònàbo wèndela pa mbù, bààkatàcishibwa mu meeji, bàmba ne: Mmukishi! ne bààkeela mbila mikole ya bwòwà.

Kadi dyakamwe Yesu wàkaakula naabo, wàmba ne: Kolèshaayi muoyi, mmémè, kanùcìnnyi to.

² Twìnyikàayaaku mitu yetu mpindyewu bwa disambila. Pàdì mitu yetu ne myoyi yetu miinyika kumpala kwa Nzambi apa, kùdikù dijinga kampana mu citanda emu, dilòlò edi anyì, dinùdì baswè kumanyisha kùdì Nzambi, mu kwela kwa byanza muulu, bwa kunùvùlukabò mu disambila? Mukalenge ànùtàngilèku, ikalèku neetu luse.

³ Taatù wetu wa mu Dyulu, nyewu tulwa mpindyewu mu Bwikadi Bwebe, tupìcila ku Dìnà dya Mukalenge Yesu. Bamanyè ne, ne ditwishibwa dibènesha, Yèyè mmutùlayè ne, twêtù “balòmbe cintu kanà cyònsò” mu Dìnà Dyèndè, Wèwè uvwa mwa kutùpèeshaci. Tudi ne kusakidila kwàbùngì bwa bwalu abu. Méyi kaèna mwa kuumvwija mushindu wutùdì tudyùmvwà bwa bwalu abu to, ne ditwishibwa ditùdì naadi, dya ne Wèwè udi utùtèeleja mpindyewu mene.

⁴ Wèwè wamònu byanza abi, Mukalenge. Udi mumanye cìwàbì bìjinga. Wèwè udi Nzambi udi mumanye byònsò, wa ngulu yònsò, udi kàyi ne mikàlu, ne tudi bamanyè ne Wèwè udi

mumanye myoyi ya bantu. Uvwa mumanye meeji etu. Nansha mene kumpala kwa twètù kufùkiibwa, Wèwè uvwa mumanye meeji ònsò atùvwàku mwa kwikala naawu, bwalu Wèwè kwèna ne mikàlu to.

⁵ Nenukudi tulòmba, Mukalenge, pa dîbà edi, pàdi majinga etu òloloka bwa kuKupeta apa, tângilàku panshi mu Maulu amu, Mukalenge, wàngatè malomba etu mu mwoyi Wèbè Wèwè mwine, Mukalenge, ne ùtwándàmunèku bilondèshile mabanji Ebe mu Butumbi amu. Tùpèèshèku dijinga dya mwoyi wètù, batwìshìibwe ne ndiswa Dyebe dya buNzambi. Ne tudi bamanyè ne ndisanka Dyebe dîmpè dya kwenza diswa Dyebe.

⁶ Tùpèèshèku cyakabidi dipòngoloka dinene dya Bwikadi Bwebe, dilòlò edi, Mukalenge. Ondòpàku babeedi. Sìngilàku bajìmine, juulàku aba bàdi bafwè mu mpekaatu ne mu matomboka, ùbàfikìshèku ku Mwoyi mupyamùpyà, dilòlò edi. Swàku bwa tùmònèku Yesu. Tudi tulòmba nunku mu Dîna Dyèndè. Amen.

⁷ Nudi mwa kusòmbaayi. Nùtùfwilaayikù luse mutùdi katùyi mwa kwakidila bantu, bwa bukesè bwa myaba ya disòmba. Kadi, kubangila anu ku dilòlò dya kumpala, bàdi bàmba ne byàkakèngela bwa kupingajabò misùmbà minene ya bantu, pa nanku nwatùfwilaayikù luse bwa cyòci aci. Ne Mwaneetu Grant pèndè, kènà anu mwanji kwibakisha cibambalu cikwabo to, bwa . . . Ngeela meeji ne ku dyabakaji nkwiikalàye ne cya kuseemeja cimanu cya dikòsolola naaci eci. Mwaneetu wa balume wa mushinga mukole, wa mushinga mukole ewu lelu mmunkonke ní ndikù mwa kuvwija cyòci eci cintu cya ku cidimu ku cidimu, bwa kwalukila ku Dallas, ku ekeleeziya wendè. Dibìikila dinene bu nanku, mu dîbà edi, mùdi biibi byende bikàngiibwa ne lukasa lwònsò edi, kadi dîbà adi muntu awu ùsua bwa mpingane ne ncìvwijè cintu cya ku cidimu ku cidimu, bwalu abu. Mémè's ndi ngaanyisha aci.

⁸ Ndi mupicile mu cikondo cya bwobumwe pamwe naabo mu dinda emu, ne Mwaneetu Gordon Lindsay ne bakwabo bàà kùdìbo. Mwaneetu Peary Green, udi mutùùdi wa mfranga bwa disangisha dilwalwà ku Beaumont awu, udi musòmbè paanyima pàanyi apa dilòlò edi ewu. Ne bààbùngì, balunda beetu, Mwaneetu Don ne mukàjèndè. Tudi ne disanka dyàbùngì dya kwikalakù naabo kaaba aka. Mukalenge àbàbènèshèku.

⁹ Mpindyewu, dilòlò edi, anu . . . Ndi mutèetèkù bwa kuvwija Mayiisha àanyi anu mapwekèle ne mwànyi mwònsò, mu mushindu wà nansha mwànà mufwànyine kuumvwa.

¹⁰ Màmàlabà mu mappingaja nekwikalè disangisha dya butangadiki, ne ndi njinga bwa nwàlwakù nwènù bònsò.

¹¹ Mpindyewu panwikalà ne masangisha mu ekeleeziya wenù sungasunga, mona's, wèwè—wèwè shààla mwaba wùdi—mwaba wèbè wà mudimu. Katwèna baswe bwa muntu nansha

umwe àshiyè ekeleeziya wendè sungasunga nansha, bwa... Ne pashiishe pawikalà usaama ne muswe bwa kulwa bwa kukusambidilabo, kadi ekeleeziya wenù mwikàle ne disangisha mààlabà mu mapingaja, ambila mpaasàtà webè bwalu abu, bwa kiiikadi wàlwa kupeta meeji mabi to, udi mumanye's. Àmanyèku ne twètù tudi mwab'ewu mmu dikwàcishangana mu mudimu, bwa—bwa kukwacisha Mubidi mujimà wà Yesu Kilisto wùdi mwanji kutùdila muneemu mu Dallas ne mu nyungulukilu emu.

¹² Pa nanku, mààlabà mu mapingaja, ngeela meeji, pa dîbà ibidi ne tusunsa makumi asatu, nêngiikalè ne cya kuyiisha Diyiisha dya butangadiki. Ne pashiishe netùsambidilè babeedi bônso, twangata twarta twônso twa disambila tûdi tushààlèshààle munda mwa lumingu lujimà atu ne bikwabo, bwa kubàsambidila bônso mààlabà awu.

¹³ Mpindyewu cyena-bwalu cyànyì dilòlò edi ncitàmbe kwikala bu mùdi dinaya nanku, anu bwa katanci kakese cyanààna. Nenku nênteetèku bwa kusambidila bûngì bwônso bûndi mwa kukumbana abu dilòlò edi, mu kusambidila kwa babèedi. Bwalu bwànyì bùdi ne, “kanùciinyi to, m'Mémè,” Yesu wàmba nanku. Cyena-bwalu cyànyì cidi ne: *Bujaadiki Pa Mbû*.

¹⁴ Bivwa ne cya kwikala lwà kundeekeelu kwa mapingaja dituku kampanda, dîbà dya muulu divwa ne cya kwikala dyenda dipwekè pààkenzekà bwalu ebu, ne mpindyewu dituku adi divwa ne cya kwikala dya luuya lukole bu mùdilu mwab'ewu emu.

¹⁵ Byamu bifidi bya citaleela mbiimane, ne bàdi munkaci mwa kubìlongolola. Ki cidi cyenzè ne nshintululè cyena-bwalu cyànyì pàncicivwà anu pambelu pààpa, pa cîmvwà mwa kwakulapù aci, bwa mmone mwa kulwijakaja naaci, bwa kabikèngedi bwa nwènù kushààla basòmbe mu luuya elu mushindu ewu to.

¹⁶ Mulobi munene ewu, paanyima pàà mumone bìvwaye mumone dituku dijimà adi abi, wàkashààla ùbandila Yesu mu mudimu Wèndè munene wà bwambì awu.

¹⁷ Mémè's mvwakù mwa kujinga kwikala ne mwoyi mu dituku adi, bwa kwikalakù muMulondè. Kadi, nudi bamanyè's, ndi ne disanka mùncidiku anu ne dyèsè dya kwenza cintu cyòci cimwecimwe aci, cya kwikala mMubandila wènza maalu. Ne mbitàmbe bunene bwa kuMubandilakù leelu ewu kutàmbe mùvwàbi mwine musangu awu. Ndi ne diitabuuja dyàbûngì mu Yèyè mpindyewu, ne ndi mwa kwikala ne diitabuuja dyàbûngì mpindyewu kutàmbe mùmvwà mufwànyine kwikala naadi mwine musangu awu, bwalu tudi bapetè bidimu binunu bibidi bwa kujaadika ne Evanjeeliyo ngwa cya bushuwa. Ne paanyima pàà bidimu binunu bibidi, Yèyè ùcidi anu ne mwoyi, wènza anu mùvwàYe wènza musangu awu, pa nanku tudi ne

ditwishiibwa dinene ne nshindameenu munene bwa diitabuujja mpindyewu kutamba mùvwàbo bôbò naabi musangu awu.

¹⁸ Bwalu, Yêyè ùvwa anu Muntu wetù ewu wa wèndakana eku ne eku wàmbilangana ne—ne Yêyè ùvwa mutùmìibwe kùdì Nzambi ne ùvwa Mwànà wa Nzambi, ne Nzambi ùvwa ùshindikila Dìyì Dyèndè dilaya dya dituku adi, ku Yêyè, ne bôbò bàvwakù anu ne kabingilà mu mushindu kampanda kàà kucyèlabò mpatà. Beena tèlòlòjì, ki civwàbo's! Ne nudi numòna ne civwa ncintu cya cyènza luse, s'civwa cyènza luse cya bushuwa, bwalu bôbò beena tèlòlòjì abu bàvwa anu bafwànyine kwikala biitàbùùje Cyòci aci bu Nzambi kàyi mubàfofòmije mèsù. Bible ngudi mwambe nanku.

¹⁹ Kadi nuvwakù bamanyè ne mMulaye ne Yêyè ùvwa mwa kubàfofomija cyakabidi mèsù leelu ewu, bwa kabàlu kuCimòna anyi? Bàvwa mwa kwikala “bapapè mitu, bàdibàndishi, banangi bàà bisànkasanka kutamba kwikala banangi bàà Nzambi, kabàyi bàkùmbaja mèyi àdìbo bàmba, bashiminyinyanganyi bàà maalu, kabàyi ne kudikànda, badyombodi bàà aba bàdì bimpè; biikàle ne cimwenekelu cya difwànà dya Nzambi, kadi biikàle bàvila Bukole bwàdi.” Mulayi mwalùkile cyakabidi anu menemene. Ne mbikole bwa wèwè kubènga kuumvwila bantu luse, ne mèsù àbò mafofomija bwa kabàmònu dituku edi. Ne Mifùndù yidi Nzambi mulaye ne yivwà ne cya kuula mu dituku edi mene, mu dîbà edi, ne twètù tudi munkaci mwa kucitàngila buludi ne tucibandila. Kadi dîbà adi bantu bàdì bàtàngila, bàkùpa mitu ne bààsa lwendu bàya, bàmba ne: “Mèmè ncyèna nCimònakù to.” S'ncintu cya cyènza luse's, kadi nansha nanku bìdì bikèngela bwa Mifùndù yulè. Bìdì ne cya kwikala mushindu awu.

²⁰ Pa nanku bayiidi aba bàvwa basungùdìibwe kùdì Nzambi. Nuvwakù bamòne ne, Yesu wàkabàmbila ne: “Kumpala kwa difùka dya dyulu ne buloba,” nkwàkabàsungulàYe, ne bôbò bàvwa dimiinu dilongolola kùdì Nzambi. Ki bwa cinyi pàakajuukà ndululu, ne bantu kumwèkabò anu bu ne bààkacincimikila Yesu mu ditumba, pa lukonko kampanda, bwàbò bôbò kakùvwakù mpatà to. Kabàvwa mwa kucyùmvwà to, kadi bàvwa bakàngè mwoyi bwa kubènga kumanya cingà cintu pa kuumusha Yêyè. “Anu Wèwè ngudi ne Dìyì dya Mwoyi.” Nenku bàvwa bakàngè mwoyi bwa kushààla naaCì, bwalu bàvwa balongolwela mudimu awu.

²¹ Nenku ki mùdibi kabidi leelu ewu ne, balume ne bakaji, bàdì balongolwela Mwoyi wà Cyendelelele abu, nebàlwe ku Mwoyi wà Cyendelelele. “Bònsò bàdì Taatù muMpèeshe nebàlwe kùNdì.” Aci ki Dìyì Dyèndè, ne kadyèna mwa kupangila to. Dìdì—dìdì Dìyì dya Nzambi.

²² Nenku nyewu tumòna bayiidi aba mpindyewu, bàvwà benzè disangisha dinene dituku adi abu, mu budimi bunene bulondè

luseke lwa mukùnà. Ne Yesu ùvwa mubàmbile ne: “Mpindyewu nwènù dyànjlàayi nùkosolòlè mbù, kumpala Kwànyi.” Kadi Yèyè ùvwa ùbànda ku mukùnà, nkààyendè, bwa kusambila. Nenku bayiidi aba, paanyima pàà bamanè kutwilangana ne balunda bààbò, mèmè ndi anu mwa kudifwànyikijila mwàkadyūmvwàbo.

²³ Bwalu, kutwilangana ne balunda, kadi pashìishe bikèngela kutapuluka ne balunda; anu dîbà dya ne nwàmányàngànyi adi, pashìishe bikèngela nùlayanganè. Ne bwànyi mèmè aci citu misangu yònsò anu cyàmba kunsaaamisha mutu, mu ditunga dijimà, pa muloba bujimà, cya kutwilangana ne balunda kadi pashìishe kubàshiya kuya, mumanye ne kùdi bààbùngi bawikalà kùyi mwa kumònakù kabidi to too ne pawàtwilanganà naabo ku Cilumbulwidi. S’mbwalu bwa dibungama’s.

²⁴ Ndi mwa kudifwànyikijila bwàtù abu, ne—ne divùngamana dyabu adi bàbùsàka ku mwelelu wà màyi. Ne ùvwa ne cya kwikala anu Simonà Peetèlò, wa maboko ne makaaya manene a mahùndà awu, wàkasàka bwàtù abu ne kubùtùmayè mu mbù. Nenku bàvwa bònsò munkaci mwa kulayangana mu dikùpangana dya byanza ne bàvwà ku mwelelu wà màyi abu. Ne bàvwa beela mbila mikole ne: “Nwàlukilaayikù nùlwe ne Mulongeshi awu bwa nwàlwa kutùmònee! Nenku nùlwayi kwenza ditàbuluja dikwabo; kadi bwa leelu kaayi twabèneshiibu kwòkò!” Ne balunda bapyabàpyà abu bàkùpa byanza. Ki kwelaye mukolo e kusambuka bayiidi bakwabo abu, ne kusòmbayè pàmwàpa ku luseke lwà mwanaabo wa balume, Andèlè, ne kwangataye nkapi.

²⁵ Mâ—mâtù musangu awu àvwa àsàkiibwa anyi kùdi lupeepele anyi nkapi yìvwàbo biita naayi. Ne dîbà adi bàvwa bafwànyine pàmwàpa kwikala basòmbè babidi mu bwàtù, babidi luseke, ne bàvwa mwa . . . anyi babidi mu cisòmbedi cimwe’s wè, pàmwàpa bikwàcilu bya nkapi bisambombo anyi mwandamukulu. Bàvwa bàkòka ku cikèmù, ne mushindu awu bàvwa mwa kulamina bwàtù mu mucu wa dibùjaalamija naawu pàvwà bipeepele bikole bituuta. Pashìishe, pàvwà lupeepele lùtuuta mwàlù mwa ciibidilu, bàvwa bàbàndisha cilàmbà cìdi cikwàta lupeepele, nenku kubùsàka.

²⁶ Cìvwa ne cya kwikala mapingaja a luuya lukole, bwa ku mmwènekèlu wa Mifùndù kumpala menemene kwa bwalu ebu, nenku cìvwa ne cya kwikala mapingaja a kakùyi mutooyi, a muunya muteemè, ne a luuya lukole. Dîbà dikaavwa dyàmba kubwela. Nenku bòbò, pàvwàbo biita apu, kwanjibò kulekelela ne kukùpa byanza bwa kulayangana ne bantu ne: “Tudi tutekemena ne twadyàkunùmònakù cyakabidi mùngà musangu,” pàvwàbo bènda bàya lwà munkaci mwa mbù apu. Nenku dibwela dya dîbà, bukènkè bubwicidile, ne pashìishe paanyima pàà katanci mî—mìdimà yikùluka.

27 Nenku bàvwa ne cya kwikala bambùlùjekù ndambu mu—mu diita amu, ne mmudimu mukole pàdì nkapi ya bujitu ayi yìbwela mu mâyi male a mbû. Ne pamwe ne bônso abu bàvwa—bàvwa balòbi, ne bantu banene bàà makàndà, biibìdilàngàne ne mbû. Nenku bu mùvwàbo batèkèmène ne Yesu ùvwa ùbwela mu bwàtù ùbàlonda, mu katanci kakese. Mona's, kuyabò kuntwaku, ne bàvwa ne cya kwikala anu bìikisha kakese; munùyàkwita amu's bwa kufikishakù bwàtù bwenu ku dyasa lwende, kadi kubùlekela bùyà.

28 Pàmwàpa Yone mutekete awu nguvwa ne cya kwikala wa kumpala ku dyakula, bwalu yèyè nguvwa mwànà menemene ku bônso abu. Ne yèyè nguvwa ne cya kwikala mwambe ne: “Ndi mubange anu kuumvwa ndambu wa dicyoka's. Twànji twikishaayikù ndambu. Anji indilaayi kakese, kabyèna bikèngela bwa twètù kulwijakaja to. Yèyè nyawu kàyi mwanji kutùpeta, pa nanku's mbipìcìbwe ne banji kwindila ndambu ne beeyèlekù kapeepa katalàle.”

29 Nenku pàvwàye musòmbe mwaba awu ne mutu mwinyika ndambu, yèyè nguvwa ne cya kwikala mukùtùle disangisha dya majaadiki. Nenku pa cyòci aci mpàndì muswe kwakula. Yèyè nguvwa ne cya kwikala mujuuke wa kumpala, ne mwambe ne: “Bànà beetu, cìdì bantu bàmba nansha ciikàle cinyi, nansha mùdì ní nganyi muswe kubènga kwitabuuja amu, ndi mèmè cya bushuwa mutwishìbwe mpindyewu, paanyima pàà leelu ewu ne, utùdi tulonda kì mmushimakajanganyi to. Utùdi tulonda ùdì anu Nzambi, bwalu muntu kì mmufwànyìnekù kwenza bìdìYe mwenze leelu ewu ebi to Yèyè kàyi Nzambi. Nudi bamanyè's, pàngàciYe màmpà awu ne kuàcìbula, ne kudiisha bantu binunu bitaanu abu mwaba wàwa apu, aci's ncintu cya cìtàmba kukèmesha bwànyì mèmè. S'kùvwa kufwànyìne kwikala mpatà kadi leelu ewu yònsò mmijikè,” mpindyewu mèmè ndi ngambulula anu bujaadiki bwèndè mùvwàbu, “kadi aci's ncikòse bwalu.”

30 Yèyè ne: “Ndi mwa kuvuluka kùkaadi bidimu. Kale wàwa mvwa musòmbèle pabwìpì ne Yadènè. Ne ndi mwa kuvuluka, pàmvwà mwànà mukese, mùvwà mààmù wanyi mulenga, wa beena Yudà awu ùngambula, mu mapingaja, ne ùnshikika pa binù apu ne ùnsèkenkeja, pambelu mu lutanda, pàvwà tuubilòngò twa nzoolo tùsàmpila ku myelelu yà Yadènè aku. Ne yèyè ùvwa ne ciibidilu cya kutàngila dyàmwàmwa mu cipèèlà, kùvwàbo balwè ne cisàmbà cyetu bapìcìle mu cipèèlà amu. Ùvwa ne ciibidilu cya kundondela maalu a mu Bible. Bumwe bwa ku maalu-malonda manene bündì mvùluka, bùvwa mbwà mukaji mwena Suunèmà pààkafwà mwanèndè mukese wa balume, ne—ne muprofeta kubiishayè mwànà mukese wa balume awu ku bafwè. Aci's cìvwa bwalu bwa bùtùpishangana ne disanka.

31 “Kadi bumwe bwa ku maalu-malonda a àtùpishangana ne disanka, àvwà mààmù ne ciibidilu cya kundondela, ùvwa

wàmba ne: ‘Mpindyewu, Yone, wêwè udi anu mwânà mukese; kadi ndi muswe wikalè muvùlùke, paudi wenda ukola apu, ne, Yehowah munene awu wàkapàtula cisàmbà cyetu mu Èjjiipitù, ki twètù kukòsolwela mu cipèèlà ne kusabuka musulu wàwa nàka. Nenku bònsò munda mwa bidimu makumi anaayi, bààkenza lwendu mu cipèèlà cyàcya, kamùyi myaba yà kupetela bilàmbà, ne kamùyi mwaba wà kudya to. Kadi Nzambi ùvwa ùlòkesha màmpà àfuma mu dyulu, dilòlò dyònsò, ne ùdiisha cisàmbà cyetu mu cipèèlà cyàcya, bwalu bàvwa mu njila wa mudimu, bènda bàlonda Yehowah munene awu. Nenku mpindyewu, dīngà dituku, Yehowah neàvwijiibwè mubidi pa buloba apa, mu mmwènekeli wa Muntu, neÀbiikidiibwè ne Mwela maanyi, Maasiya.’

³² “Ne ndi mvùluka ne,” mùvwàye mufwànyine kwamba, “mémè bu mwânà mukese, mùvwà meeji àànyì a bwânà awu àdifwànyikijila, àteeta kudifwànyikijila’s ne: ‘Mmunyi mùvwàku Nzambi ùbàdiisha bòbò bònsò, bantu miliyò yibidi ne citùpà abu, mu cipèèlà cyàcya? Ùvwa ùpeta miine màmpà ònsò awu munyi?’ Nenku mwva ne ciibidili cya kukonka mààmù ne: ‘Mààmù, Yèyè, Yehowah ùdi ne—ùdi ne musùmbà munene wà mfuulù muulu mu dyulu mwàmwa, nenku Yèyè mufwànyine kwosha màmpà ònsò awu, ne kutùuluka lubilu bufuku, ne kuàtèekela bantu pa—panshi apa, ne maulu manene a Yehowah awu mmùle tente ne mfuulù anyi?’ Ùvwa wàmba ne: ‘To, mwanàànyì, wêwè ucidi mwânà bikole bwa kuumvwa. Wamònu’s, Yehowah m’Mufùki. Yèyè kàtu dijinga ne mfuulù to. Ùdi wàkula anu cyanààna ne Dìyi Dyèndè dimwèneshiibwa pàdìYe wàkula apu. Yèyè n’Yehowah munene, nenku Ùvwa ùcyàmba anu cyanààna. Nenku Banjelo mbàdi bààbanyina bantu, pa buloba apu.’

³³ “Nenku leelu, pàngààMumònu mwîmane mwaba wàwa, nuvwakù bamòne mmwènekeli uvwaYè nendè kwìsù awu anyi? Kakùvwakù mpatà mu meeji Èndè to. Mwva mubànde lwà paanyima pàa dibwe adi, ne mémè kutàngila mùvwàYe wàngata dyàmpana adi ne ùdicibula, ne ùdifila kùdi...Bambi Bèndè, twètù, bwa kuàbanyina bantu. Ki pashishe pòlòlùYe cyanza bwa kucibula cyakabidi, mulungu wà dyàmpana awu wùkaavwa cyakabidi mujimà. Nenku kwenzaYe aci misangu nkama, too ne mwàlu muntu ne muntu kuukuta, ne kùvwa bisakà, tente, byàsàngishìbo. Ndi mumanye ne aci civwa mwa kwikala anu Yehowah, bwalu Yèyè wènji anu mwàkenzà Yehowah amu. Anu Yehowah ngudi mwa kufùka. Ne mémè ndi mumanye ne Muntu awu kî mmushimakajanganyi to. Kùdi Mufùki anu umwepele, ne mwine awu n’Yehowah. Nenku mpindyewu, ku bintu byònsò bínkaadiku mumòne, aci ncyàntwishì.

³⁴ “Ndi muswe bwa numanye mpindyewu ne wànyì mwoyi wàdilekèlèdi ne kasukì, ne ndi ngiitabuuja anu menemene ne Yèyè kènà anu muprofeta nàka to. Mmuprofeta, kadi mMutàmbe

ne muprofeta. Yèyè kèna cîngà cintu to anu Yehowah Nzambi musòmbèle munkaci mwetu, bwalu Wáfuku mâmpà, ne Úvwa ne biibidilu bya Yehowah. Kabyèna bikèmesha to mùvwàYe mwa kwamba ne: ‘Mémè nciyi ngenza byenzedi bya Taatu Wanyi to, díbà adi kanùNgiitabùùji to; kadi Mémè ngenza byenzedi bya Taatù Wanyi, ne nwènu kanüyi mwa kuNgiitabùùja Mémè to, itàbùùjaayi byenzedi, bwalu byôbì mbìdi bìMfidilà bujaadiki ne byàmba ne Mémè ndi Nganyi.’ Bivwa bimwèke anu bu ne bantu bàvwakù bafwànyine kwikala bamòne ciine aci, bipeepele.”

³⁵ Nenku Yone úvwa mutwishiiibwe ne Yèyè nguvwa Maasiyà, Mwine uvwa Yeshàayi mwambe awu ne: “Bätülelèdi Mwànà wa balume, ne Dîna Dyèndè nedibiikidiibwè ne Mubedyanganyi, Mfumu wa Ditalala, Nzambi Mukole, Taatù wa Kashidi.” Nenku Yone wàkatwishiiibwa bwa civwàYe mumone aci. Nsongàalùmè awu mwikàle ùfila bujaadiki bwèndè’s.

³⁶ Lwà pa diine díbà adi, Simonà Peetèlò kwambaye ne: “Ee, mpindyewu, anji indila kakese. Twètù baswè kwenza disangisha dya majaadiki, mémè nêngùkalèku ne cintu cya dyamba. Nudi bamanyè’s, mémè ewu mvwa ne mpatà ya dikema ya cintu cyònsò mu kaabujimà, pàvwà mwakunyaànyi Andèlè, uvwa mukabwele mu ditàbuluja dya muprofeta Yone awu, mwine uvwa mufile bujaadiki ne Maasiyà úvwa ùlwa ne yèyè nguvwa ne cya kuMuleeja kùdi bantu awu. Nenku mémè mvwakù ne mpatà ndambu bwa bivwà Andèlè mwa kungambila abi, bwalu nkààvwù muumvwe mishindu ne mishindu ya maalù ne bikwabo bàlonda bwa Maasiyà.

³⁷ “Kadi nwènu bânà beetu bònsò aba’s nudi bavùlùke taatù wanyi mununu awu. Dîna dyèndè úvwa Yona. Nenku’s nudi bamuvùlùke, mùvwàye mwena kwitabuuja wa lulamatu lwà menemene. Mushindu wùndi mwa kuvùluka mààmù ne tààtù, ne twètù bònsò, mutùvwà tulòba bwa kumòna mwa kudya, kadi katùyikù mwa kukwata nansha mushipa to; tuvwa dijinga ne mâmpà, ne mutùvwà tutwà binù panshi tusambila Nzambi ne: “Tùpèèshèku mishipa leelu, Nzambi, bwa twamònakù mwa kupàanyisha mishipa yetu ayi, bwa kufuta mabànzà, kupetakù nshimà ya kudya.” Ne mutùvwà tuya pa mbù, mu cipeepele cikole, ne tupeta dikima dya—dya kukungamangana ne bipeepele bikole abi.

³⁸ “Nenku papa, ndi mwa kumona mvya yèndè ayi mimupwekele mu dikoshi, dîngà dituku pàvwàye musòmbè pa mwonji wà bwàtù ne kwakulaye naanyi, wàmba ne: ‘Simonà, wèwè’s ki mwanàanyi mwanàabutà. Udi mumanyè’s, mémè ewu ntu misangu yònsò anu mwitabùùje, Simonà, ne nèmmonè Maasiyà. Cisàmbà cyetu nciMwindile kacya ku Edènà. Kadi tudi batwishiiibwe ne Yèyè ùlwalwa, nansha munènge bìshi. Kùkaadi bidimu binunu binaayi, mùdi wamba. Kadi ndi ngiitabuuja ne Maasiyà neàlwe anu kulwa. Ne mwena Yuda yònsò úvwa anu mwitabùùje ne úvwa mwa kumona Maasiyà mu lwèndè lukòngò.

Mêmè ndi mutekemene ne nêMumònè mu lwànyì lukòngò. Kadi mbimwèke anu bu ne, nkàadi nkùlakaja mpindyewu, bikèngela ndekele midimu ya pa mbû eyi, nkàadi ngumvwa bisaamà ne matàkanyika, pàmwápa ncyàkuMumòna mu cyànyì cikondo eci to. Kadi pàmwápa wèwè neùMumònè, mwanàànyì.

³⁹ “Nenku ndi muswe kukulongesha mu Mifundu. Mwanàànyì, kumpala kwa Maasiyà kajuukaYe mu cyalu, nekwènzekè bintu bya mishindu yònsò, bintu bya mashimi bya mishindu yònsò, bwalu Sàtaanà neénzè nanku, bwa kunyangakaja bwenzeji bwa Maasiyà mulelela pàalwàYe.” Bitu misangu yònsò anu mushindu awu; anu mushindu awu.

⁴⁰ Ne pashìshe tudi tusangana ne, kwambaye ne: “Ndi mvùluka ne yèyè wàkangeela diboko kunshingu, kwambaye ne: ‘Mwanàànyì, kùdi mushindu anu wumwepele wuwikalàku mwa kujingulula Maasiyà awu. Mpindyewu tudi benze bidimu nkama katùyi ne muprofeta to. Maalàkì nguvwa muprofeta wetù wa ndekeelu. Aci kùkaadi bidimu nkama yinaayi, kutùdi katùyi bapete muprofeta. Kadi wavùluka, Mòsà wàkatwàmbila, mu Mifundu, ne, pàalwà Maasiyà, Yèyè neikalè muprofeta, pàajuukàYe mu cyalu. Twètù beena Yuda tutu bayiile bwa kwitabuuja muprofeta. Ne lwendu lwà Maasiyà pa buloba lùdi Dìyì dyakula dya Nzambi, dìdìYe mutulayè. Ne Dìyì misangu yònsò diti dila anu kùdi muprofeta, ne muprofeta ngutu ushìndika Dìyì adi. Kupukù aci mwoyi nansha, mwanàànyì! Kùdi mwa kajuuka bintu binène, kùdi mwa kwikala dizùka dinene ne—ne bintu binène. Kadi wavùluka ne, Maasiyà awu neikalè muprofeta, bwalu tudi bamanyè ne Nzambi kàtu ushintulula njila Yèndè to, ne Yèyè mmwambe ne Maasiyà awu neikalè muprofeta. Pa nanku uvulukè, mwanàànyì, baprofeta ng’aba bàdì ne Dìyì dya Mukalenge. Nenku pàalwà Maasiyà, Yèyè neikalè muprofeta.’

⁴¹ “Mêmè ncidi anu mwa kuumvwa diboko dyèndè adi,” mwàkambà Simonà, “mùvwàye mudìngeelè kunshingu. Nenku Andèlè uvwa mwimane mwaba awu usukula bukòndò, pa diine dîbà adi. S’udi mucivùlùke’s, Andèlè?”

“Eyowa, Simonà, ndi—ndi mucivùlùke.”

⁴² “Kadi Andèlè ùteeta kungambila ne Yone ewu uvwa muprofeta. Mêmè mvwa ne bingà bintu bya dyenza, bivwa bikèngela mpaanyishè mishipa ne bikwabo. Pa nanku tààtù mmufwe kùkaadi bidimu, kadi ntu misangu yònsò anu kacya ngaacilama mu meeji; papa wàkamba ne: ‘Maasiyà ewu neikalè muprofeta mumanyishìbwe bilondèshile Mifundu, ne kùcipukù mwoyi to, bwalu n’Dìyì dyakula dya Nzambi. Ne dyòdì Dìyì adi dikaadi ku musangu ne ku musangu dilwàlwàlwe misangu yònsò anu kùdi baprofeta; bàvwà bàcimanyishà, anyì bàmwènesha civwa cilayiibwe bwa cikondo aci.’”

43 Kadi mpindyewu Simonà ne: “Dituku dikwabo,” mwàkambàye, yèyè ne, “nudi bamanyè’s, Andèlè kundombaye bwa kuya mu disangisha kampanda. Ki mèmè kuya mu disangisha adi mùvwa Muntu ewu, Yesu, ùsanganyiibwa. Kadi nkààvwakù muumvwe minungànyì ya mishindu ne mishindu. Kùkaavwakù kujuukè Yesu kampanda, kumpala Kwèndè, wàkalaya mùvwaye mwa kwikala cintu kampanda cya cinène, wàkapàtuka ne bantu nkama yinaayi ne bònsò abu kubùtukabò, ne bikwabo. Ki mèmè kudyàmbidila ne ùvwa anu mukwabo pèndè wa mushindu awu, mwikàle ne dizùkà dinene dya mushindu kampanda bwa ditàbuluja kampanda, anyì dingumba kampanda dinene divwàbo ne cya kwenza. Kadi dīngà dituku mèmè kwela meeji ne mvwa mwa kuya ne Andèlè, mwakùnyàànyì ewu.”

44 Ne ndi mwa kudifwànyikijila ne, lwà pa diine dībà adi, bwàtù bwàkabanga kutènkakana. Muntu kampanda kubangaye kwela mbila, ne kwambaye ne: “Sòmbelà panshi! Kutènkakaji bwàtù to. Indila kakese. Shààla mupùwe.”

45 Nenku kwambaye ne: “Nudi bamanyè’s, pàngàakayà kuntwaku ne mèmè kufika kumpala Kwèndè aku, bwa wanyì musangu wà kumpala, Yèyè kuntàngila buludi mu mèsù ne kungambilaYe civwà dīnà dyànyì. Yèyè kàvwakù mwanji kummona kacya to. Kààkammanya anu mèmè to, kadi Wàkamanya ne taatù wanyì mununu wa difwàna dya Nzambi, uvwa mundongeshe mu Mifundu awu. Ki mèmè kumanya ne Awu nguvwa Maasiyà. Bwànyì mèmè aci kukòsaci bwalu, anu mwaba awu. Mmùvwàbi. Bwànyì mèmè, aci cyàkamana bwalu.”

46 Ùvwa ne cya kwikala Filipò wàkamba ne: “Ndi mwa kwelakù pàànyì dīyì kaaba aku anyì?” Mpindyewu yèyè kwamba ne: “Mwaneetu Natànaèlè, eci kacikutàpikù ku mwoyi to; bwalu, udi mumanye ne twàkalonga mivùngu bidimu ne bidimu, civwà Maasiyà mwa kwikala. Kadi mèmè ndi mwenze anu mMumona wènza aci anyì, pàànyì ngumba nya nkangata mulunda wanyì, Natànaèlè ewu. Ne pààfikiyè lwà. . . .”

Natànaèlè kwambaye ne: “Lekèlè ncyàmbè mèmè. Lekèlè ncyàmbè mèmè.”

47 Kaa, nudi bamanyè’s, kùdì cintu kampanda pàdì Yesu mukwenzèle cintu kampanda, kwèna—kwèna anu mwa kushààla mupùwe to, bikèngela anu ùcyàmbè, wèwè mwine. Kì mmwòmò anyì? Cyòci ciikàle cintu cya dya bushuwa, bikèngela anu ùcyàmbè. PààkanguujàYe mèmè ne Nyuma Mwimpè, ntu muswe anu kwikala ncyàmbilangana. Ntu muswe bwa muntu kampanda àcimanyè. Kì mmukwabo muntu ùcyàmba to; ntu muswe kucyàmba, mèmè mwine.

48 Nenku mèmè ndi anu ndifwànyikijila ne, Natànaèlè kuzùkayè bikole ne kwambaye ne: “Nudi bamanyè’s, ndi muswe kwamba nunku. Mvwa ne mpatà ndambu bwebè wèwè,

Filipò, paùvwà mungambile apu. Mémè kukukonka ne: ‘Cintu címpè ncifwànyinekù kupàtukila mu Nazàlèètà anyi?’ Ki wèwè kumpèèsha dyandamuna ditàmbe bwimpè dikaadiku muntu naadi ne: ‘Lwâ ùmonè.’” Adi’s dìdi dikwàta mudimu bimpè leelu ewu. Ncya bushuwa. Kùshàadi kumbelu bwa kudyula to. Lwâ ùdimwènè wèwè nkààyeebè, wamònu’s. “Mémè ne: ‘Cintu címpè ncifwànyinekù kupàtukila mu Nazàlèètà anyi?’ Wèwè kwamba ne: ‘Lwâ ùdimwènè.’ Ne wèwè udi mumanye cyúvwà mungambile.

49 “Nenku ndi mwenze anu mbwela mu Bwikadi Bwèndè anyi, Pèndè ùngambila mündi ‘mwena—mwena Ebèlù, mwena Izaleela, ne mündi muntu wa meeji matòoke,’ aci mvwa mumanye.

50 “Kadi mémè kudikonka ne: ‘Mbifwànyine kwenzeka bishi?’ Pèndè ùmwèka anu muntu wetù wa patupu ewu’s. Mémè mvwa mutekemene ne Maasiyà neàtuulukilè mu tujila twa ngólò twa mu Dyulu, ùya buludi kùdi mfumu wa dingumba dya muneemu edi, mu Yèlusàlèmà, ùpàtuka wàmba ne: ‘Kaayifà, ki Mémè wáfiki ewu.’ Kadi kusanganabo ne, Yèyè wàkapàtukila mu Nazàlèètà, mu dikù dya bapele; ne mu bushuwa bwa bwalu luumu lubi luMulamika paanyima, bu ‘mwànà mwela mu masandi.’ Ki Yèyè ewu mwimane, muvwàle bilàmbà byetu bya patupu ebi, kàyi bu mwakwidi anyi muntu kampanda to; anu muntu wetù wa patupu ewu. Ki mémè kwela meeji, pàngààfikì mwaba awu ne: ‘Cìdi mwa kwikala Maasiyà munyi? Muvwàle civwàlù cya kale, cikaavwàYe muvwàlèvwàle kacya anu pàcìvwàYe nsongà mutekete, ne apa muvwàle civwàlù cimwecimwe aci; ne nsuki Yèndè miMupwekèle paanyima. Ne mmwènekèlu wa muntu anu wetù wa patupu mupici wa njila ewu.’

51 “Ki kuntàngilaYe mumpala, kwamba ne: ‘Kumpala kwa Filipò kukubiikilayè, paùvwà mwinshi mwa mucu apu, Mémè mvwa mukumòne.’ Bwànyì mémè aci kukòsaci bwalu. Mémè kumanya, ku Dìyì ne, ki Maasiyà awu. Úvwà n’Yèyè.”

52 Ne bwátù bùvwà ne cya kwikala bunyùkùke, kadi disangisha dya majaadiki adi òvwà anu ditùngùnùke. Kaa, cikondo cilenga kaayi cìvwàbo bàpìcila’s wè, pa mbù pààpa, bàpìcila anu mu cikondo cilenga.

53 Andèlè kwambaye ne: “Ndikù muswe kwamba bwa katanci kakese cintu kampanda cìvwà cimbazùle. Nudi bavùlùke patùvwà—patùvwà tuya ku Yelèkò apu anyi? Yèyè ùvwà mwambe ne: ‘Tudi ne cya kuyakù; bìdi bìkèngela bwa Mpicilè mu Sàmaalèyà.’ Pa nanku, Yèyè kuya ku Sàmaalèyà ne ku nsesa ya Siikà kwàka, pààkatùtumàYe bònsò bwa kuya kasumba byàkudyà mu nsesa amu.”

54 “Kaa, eyowa’s, mémè ndi mvùluka aci, bimpè!” Bònsò ne: “Eyowa, eyowa!” Bwátù bùvwà anu bùtènkakana, muntu yònsò

mwikàle anu ne bujaadiki bulenga paanyima paa ditàbuluja dijikè. Nenku bàvwà bènza disangisha dya majaadiki edi.

55 Ki yèyè ne: “Eyowa, ne nudi bavùlùke ne twàkalwa twenda tudifinda, kadi, cyàkatùpapulà ncyà ne, twàkamòna Mulongeshi wetù ùyiikilangana ne ndumba mumanya bìmpè. ‘Uh-huh,’ mutwàkadyàmbidilà, ‘s’mbibi’s. Mutàngilaayi n’Yèyè wàwa ùyiikilangana ne nsongààkàjì ewu. Wa bwalu mutùtùme twètù kwa cyanààna, kadi n’Yèyè ewu apa musòmbe kaaba aka ne mukaji wa luumu lubi ewu.’ Vùlukàayi ne, tuvwa biimànyìne anu lwà paanyima pàà bisuku, biikàle tutèèleja muyiiki wàbò awu.

56 “Ki twètù kuMuumvwa wàmbila mukaji awu ne: ‘Mukaji, ndà kangàte bàyeebè kadi ùlwe mwab’ewu.’

57 “Ki twètù kwamba ne: ‘Ee, tudi bafwànyìne kwikala batùpàkàne’s, mukaji wàwa pàmwàpa mmusèdìibwe mu mushindu mujaalàme.’

58 “Kadi mukaji awu kuMutàngilayè cyakabidi mumpala, kwambaye ne: ‘Mukalenge, mèmè ncyèna ne mulume to.’

59 “Nudi bavùlùke mwàkambà myoyi yetu kwimana amu anyi? ‘Maasiyà wetù munene ùtùvwà beeyèmene, wàkwàciibu mu mashimi, a pa bùtookà, bwalu Yèyè wàkamba ne “ndà kangàtè bàyeebè,” kadi mukaji awu kujaadikaye mùvwàye kàyi ne mulume. Mpindyewu aci’s nciMukùdimùkile’s.’ Nudi bavùlùke mutùvwà bònso bamwèke ne nciùpapùle, ne mupùtùyà wà munda mutwimàne anyi?”

“Eyowa, mèmè ndi mucivùlùke.”

60 “Ne pashiishe nudi bavùlùke mèyì àkalondà awu anyi? Yèyè kwamba ne: ‘Wambi bulelela, bwalu ukààvwa naabo bataanu, kadi ewu ùdì musòmbe nendè mpindyewu awu kí ngwebè to.’ Kaa, nudi bavùlùke disangisha dya majaadiki paanyima pàà bisuku adi anyi? Ekelekele!” Nwamonu’s, kwèna mwa kuMucìncimikakù to. Yèyè n’Nzambi. “Kaa,” mwàkambà Simonà, “aci kacýèna anu. . .” Andèlè kwambaye ne: “Bwànyì mèmè aci’s cyàkakòsa bwalu.”

61 Baatòlòmèyò kwambaye ne: “Indilaayi, ndi muswe kwelakù bujaadiki muntwamu. Ndikù mwa kwela anyi, bânà beetu?”

62 “Kaa, ee, ngeela meeji ne udi mwa kwela’s, tudi ne dîbà bùngí cyanààna. Yèyè nyawu kàyi mwanji kulwa, pa nanku’s netwìtèku anu ndambu. Tùngunukààku, Baatòlòmèyò, filaaku bujaadiki.”

63 “Ee, bwànyì mèmè cimwe cya ku bintu bìdì bitàmbe bunene, nudi bavùlùke mwaneetu wa bakaji wa mu Yelèkò mwàmwa awu, dîna dyèndè Leebèkà?”

“Eyowa.”

“Ne bàyèndè uvwa ùlombola nzubu wa didiila byàkudyà muntwamu.”

“Uh-huh.”

64 “Ne—ne bàyendè awu ùvwa mwena kantu-ku-byanza, ne dîna dyèndè ùvwa Zakààyò.”

“Eyowa, eyowa, mêmè ndi mumuvùlùke bîmpè.”

65 “Nudi bavùlùke ne, mu—mukàjèndè awu ùvwa umwe wa ku bânà beetu bàà bakaji. Wàkiitabuuja Mukalenge, kadi ùvwa ne bwôwà bwa dikèma bwa ne nkwepi kùvwà Zakààyò mwa kupicisha mpùngà ewu kadi kushààla kàyi wítaba Yesu. Kadi, kaa, Zakààyò awu ùvwa mulunda wa katàpùla-katèeka wa mwakwidi wa muntwamu. Pa nanku mukàjèndè ùvwa ùsambila bwa ne cintu kampanda cyènzekakù bwa mèsù a bàyendè kukàngukawù, bwa wàjingululakù ne ewu ki ùvwa Mulongeshi, ùvwa Dîyi dya Nzambi dishindika, divwijiiibe mubidi munkaci mwetu. Ne twètù twàkateetakù bwa kwambila mukaji. . . kwambila mulume mùvwà Yesu wa ku Nazàlèetà awu ùmanya maalu masokome a mu mwoyi, bileeja ne Yèyè ùvwa Dîyi, bwalu Dîyi dîdi dijingulula meeji a mu mwoyi.

66 “‘Macimbu wè,’ mùvwàye wàmba, ‘mêmè ndi ngiitabuuja mwakwidi. Cidi mwakwidi wàmba aci ki cidi cîmpèku bwànyì mêmè.’ Bwalu yèyè ùvwa wa ku tusùmbù twònsò—twònsò twa mu nsesa ayi, twa ba-Kiwanis ne bikwabo byònsò, nudi bamanyè’s, pa nanku yèyè. . . byenzè bikole’s bwa yèyè kubilekelela anu nanku. Nenku Leebèkà ùvwa mutùlombekù twètù bònsò aba bwa kusambila—bwa kusambila. Kadi musangu wònsò wutùvwàku anu tukalenga cyena-bwalu cya ne Yèyè mmuprofeta, yèyè ùvwa wàmba ne: ‘Macimbu! Mwakwidi ùdi wàmba ne: ‘Yèyè awu m’Belèzèbùlà. Yèyè ndémon. Ùdi wènza aci ku bukole bwa dyabulu. Ne Yèyè ùdi anu mubadi wa mu meeji a bantu wetù ewu. Ki cyònsò cidiku. Kakwèna bwa nsongo to.’ Pa nanku cintu bu nanku kacayènakù to mu dituku edi; katwèna bapetè baprofeta to kùkaadi nkama ya bidimu. Kadi mmunyi mùdiku Mulumyana awu, wa bwalu kàyikù nansha ne karta kàà buumambala to, mmunyi mùdìYekù mufwànyine kwikala muprofeta? Kaa, kakwènakù mushindu bwa kwikalaYe cintu bu nanku nansha!’

67 “Kadi, nudi bamanyè’s, Leebèkà yèyè, mukàjèndè awu’s, wàkakwàta anu kacya wàkwàta, ne kusambila. Nenku dinda kampanda divwà Yesu ùbwela mu nsesa ayi, ee, dîbà adi tudì tusangana ne, Leebèkà kutùlondelayè ne Zakààyò ùvwa mupàtùke muyè ku—ku njila aku, bwa kuMumona. Kadi kàvwa wítabuuja ne Yèyè ùvwa muprofeta to, pa nanku kwambaye ne: ‘Néngànji anu kuMutangila bya bîmpè menemene,’ mwàkatùpèeshàye bujaadiki mu nzubu wa didiila byàkudyà amu dituku adi patùvwà tudya apu. Nenku kubàndayè ku mucì wà sycamore, ne kwambaye ne: ‘Udi mumanyè’s, néngànji anu kudyàlula kuulu eku mu mushindu wà Yèyè kàyikù mwa kummona to. Mêmè ndi muntu wa katùpà, nansha bishi, mwípi

menemene. Ne mêmè ncyèna ne mushindu wà kuMumona panshi pààpa to, mu musumbà wà bantu, pa nanku nêmbandè anu kuulu kwa mucì eku.’ Ki kubàndayè mwaba wùvwà matàmbà abidi—abidi matwilàngàne, ne kusòmbayèpu, pa matàmbà awu.”

⁶⁸ S’ki mwaba mwîmpè wà kusòmba ngwôwò awu bwa kulonga bwalu abu. Ki mwaba wùdi njila yibidi yisambakeena, webè wèwè ne wa Nzambi; mmwènenù yebe’s. Ki cintu cîmpè ncyôci aci, bwa kwelanganapù meeji.

⁶⁹ “Ki kwambaye ne: ‘Udi mumanye’s, Yèyè ùdi ne cya kwikala anu muprofeta. M’Mufwànyì anu kuciikala’s. Mbfwànyine anu kwenzeka ne mêmè ngiikalè mutùpàkàne. Pa nanku nkwambilè bishi, mêmè’s nêmmutàngilè bya bîmpè menemene; ne Yèyè kààkummanya to. Pa nanku nêngàngatè anu mabeji ônsò ne ngàkòkèlè kùndi mushindu ewu, manjingile, nenku nèndyâlùlè mu mushindu wà Yèyè kàyikù nansha ùmmòna to nansha kakese. Nenku mêmè nêmmubandilè pààfikilàYe pabwîpì. Kadi Yèyè kàyì ne mmwènekèlu wa muntu wa mushindu mujaalàme to, mêmè nêmmwambilè cindì naaci mu meeji, pàndi musòmbèle kuulu kwa mucì ewu apa.’ Ki kutàngilayè, ne ùvwa ne dibeji divwàye mwa kubàndisha bwa kuMumona pàvwàYe mwa kubènda mu disangu amu.

⁷⁰ “Nenku mMwenze anu ùbènda mu disangu amu, wènda ùpweka ne njila, nudi bamanyè’s, ùkènzakana elu luseke ne elu luseke, ne bayiidi bàmba ne: ‘Imànyinaayikù ku luseke. Mfwilaayikù luse.’ Ne bantu pààbò ne bàna bàsaama ne bikwabo. ‘Mfwilaayikù luse, Mulongeshi mmucyòke bibì be; ku mudimu munene wà makeelela dilòlò awu.’ Nenku, mu mushindu wà bukàlàngà, ne: ‘Swàyikù nwimanyinè ku luseke bwa nùMushilèku mwaba àpitè, pàdiYe ùya Mutàngile ku nsesa, nenku nudikù mwa kuswa bwa kwimanyina ku luseke anyì?’ Nenku Zakààyò muzàngàme kuulu kwa mucì aku, ùMutàngila panshi apu.

⁷¹ “Ki Yesu kulwa buludi tàmakàtàmakà too ne mwinshi mwa mucì awu, kwimana, kutàngila kuulu e kwamba ne: ‘Zakààyò, tuulukà kuulu aku. Leelu wa baaleelù Nyàaya neebe kwebe kumbelu, bwa didya dya mundaamuunya.’ Bwànyì mêmè aci cyàkakòsa bwalu. Yèyè wàkamanya ne ùvwa kuulu aku, ne wàkamanya dînà dyèndè, ne cìvwàye. Aci’s cyàkakòsa bwalu. Wàwa m’Maasiyà, bwànyì mêmè. Eyowa’s, mukalenge. Bwalu, tudi bamanyè ne Maasiyà ùvwa ne cya kwenza cyôci aci. Cya bushuwa. Pa nanku Yèyè ùvwa ne cya kuya nendè kwèndè kumbelu, mwàkambàYe, dituku adi bwa didya dya mundaamuunya. S’cìvwa cikondo cilenga be! Tudi bacivùlùke.”

⁷² Nudi bamanyè’s, cìvwa ne cya kwikala lwà pa dîbà adi, divwà disangisha dya majaadiki adi munkaci mwa kwenzeka. Nudi bamanyè’s, bayiidi aba pa mbù apu, bàfila majaadiki,

cìwva ne cya kwikala mu mîdimà mikole ya bufuku mu mwaba kampanda, mu malaba a ku nord kwàka, mùvwà Sàtaanà ne cya kwikala museemène kulu kwa kakùnà aku ne mwinàngile panshi. Kutàngilayè mu disangisha dya majaadiki adi, kusanganaye ne bàvwa bayè kabàyi Nendè to. Ki pendè pàa kubwelela pàvwa mpòpù apu.

⁷³ Nwamonu's, ngeela meeji ne bwalu abu mbwenzè anu bu bwalùkile cyakabidi, bwenzùlùke. Bòbò, mu dizùkà dya mu ditàbuluja adi, bàvwa bayè kabàyi Nendè to. Ne ndi ngeela meeji ne mu mishindu yàbùngì ki bìdì bitwènzèkèle leelu ewu ebi, ne, mu dîbà dya cibwejàkàjì edi, ne paanyima pàa ditàbuluja dinene ditùdì bafidile bujaadiki edi. Nditangàlake diyè buloba bujimà. Ditunga ne ditunga dyònsò ndipete midilu ya ditàbuluja mijuuke, ne munkaci mwa kuteema; masangisha manene a dyondopa; bantu bàpeta Nyuma Mwîmpè, binunu makumi kuvudija ku binunu. Ne mu dizùkà dyàdi amu, mùvwà bayiidi abu bàfila majaadiki a bìvwàYe mwenze, “kabidi, kaa, tudi baMumòne wènza *cikampanda*, ne tudi baMumòne wènza *cikansanga*,” mèmè ndi ngeela meeji ne tudi baase lwendu bayè mwàkenzàbo amu, katùyi Nendè to.

⁷⁴ Tudi baase lwendu bayiilè pa mpùngà minene yìdì—yìdì ditàbuluja difile. Tudi baase lwendu bayiilè pa mpùngà ya dipetela mfranga yàbùngì, maekeleeziya, dyasa dya bitanda bitàmbe bunene, myaba minene menemene ya yiyiila mìlìyò ya ndola, bilongelu binène, ndongolwelu ya bulongeshanganyi bwa tulaasa, ne ya kudyundisha kwa dingumba dyetu. Ne pashiishe kwikala ne ndongamu yetu ya communisme, ya dilwishangana ne communisme, ki cyònsò citùdì mwa kwakwilapu leelu ewu. Ne katanci aka, Sàtaanà ùkaadi mutùmòne pa ndongamu yetu ya dilwishangana ne communisme ayi, pa ndongamu yetu minene ya cyena-mangumba, ne pa byetu bya ne “twasàkididi mùlìyò mujimà” abi, ne bikwabo, mùkaadibo naabi emu.

⁷⁵ Kadi tudi baase lwendu bayè katùyi ne masangisha a milombo a cyena-kale ne dyalukila dya dibàtiiza dya Nyuma Mwîmpè, mu mushindu wà ne mudilu wùkaadi wùjima. Udi mwa kwela mbila, ne uteeta bwa kufikisha bantu ku cyoshelu, kadi bàdi bàlwa anu bu bàdì bàmba kufwa, bacìinà kulwa. Ne pashiishe lombaaku bambi bwa bàlwe kusambilakù naabo: “Kaa, wàndòmbu mèmè bwa cinyi?” Ne dya bàya kwine aku anyi, byènza bikole bwa kubàpetakù. Ne bàdi bìimanakù bwa ndambu wa tusunsa, bàmbula mèsù bàkutàngila wèwè, nenku bààlukila bàya kasòmba pa myaba yabo. Bwànyì mèmè, mudilu wùkaadi mujìme! Cintu kampanda ncyenzeke. Tèèlejàayi! Cidì citùkèngelà nditàbuluja, mùdì bangènzàmpèkààtù, pàdìbo bàtàngila Kilisto, bànyingalala, bànyeemena ku cyoshelu ne byanza byela muulu, bèèla mbila mikole bàlòmba luse, ne ekeleeziya mujimà mwikàle mukwate kapyà, kàà butumbi bwa Nzambi.

76 Dizukà dyetu bwa mpùngà wa difikisha mangumba etu ku didyunda awu, tukàadi baase bilongelu binène bwa kulongesha bambi, ne kubàtùma kule menemene ne Nzambi kutàmba mùvwàbo bangabanga. Nzambi kàtu ùmanyikila ku dilonga dya tulaasa to. Kàtu ùmanyikila ku teòlòjì to. Nzambi ùtu ùmanyikila ku diitabuujà. Kwèna mwa kuumvwija Nzambi nansha. Yèyè mmupite dyumvwija.

77 Tàngilàayi cìdici cyenze, twètù beena Mpenta bàvwà kale wàwa biikàle mpenta abu. Bakaji beetu bàkaadi babebùle nsuki yabo, bàlaaba bilaabu bya kwisù. Balume beetu bàdi bàcyànyishila. Bambi beetu bàdi bàcyànyishila. Bàdi bàciina bwa kwambakù cintu kampanda pa bwalu abu. Ekeleeziya neàbìpàtè bóbò badidìnge bacyàmbè. Kaa, s'bidì bitùkèngela disukula dya nzubu, kubangila anu ku cyambilu too ne kwinshi. S'mbundù's. S'ndibulà dya ngàsà.

78 Muntu kampanda mmulwe kùndì, anu abidi àdì panshi aa, kwambaye ne: “Mwaneetu Branham, bantu's mbakunange.” Kadi yèyè ne: “Wèwè udi anu ubàtandisha, utàndisha bakaji abu, bwa diikala dya ne nsuki mîpì ne bintu bya mushindu awu.”

Mémè ne: “Bible's mmwambe ne bidì bundu bwa mukaji kwikalaye naayi nanku.”

79 Ùdi ùfwisha bàyendè bundu pàdiye naayi nanku apu. Ne kakùyì mpatà to ncimanyinu cya ne wèwè ukàadi mutàpùlùke ne Nzambi. Vùlukàayi ne, bwa Shimishòona, nsuki mile yìvwa cimanyinu cya Mùnaazi ne yèyè ùvwa mutàpùlùke ne maalu a pa buloba, mulamàte ku Diyì dya Nzambi. Nenku paùdi ubebula nsuki yebe apu, nwènù bakaji, udi uvila ne udi ne cimanyinu cya Mùnaazi. Udi muyè ku Hollywood pamutu pa kwalukila ku Bible. Bible mmwambe ne: “Kabiikadi ku mutu kukungula to.” Nwamonu's, mbundù, ne bambi kabàyi bàmba cintu nansha cimwe pa bwalu abu to.

80 Muntu ewu kungambilaye ne: “Bwa cinyì kùyì ulekelakù bakaji bàba patupu?” Yèyè ne: “Bóbò's bàdi bàkwangata bu muprofeta.”

Mémè ne: “Kacya mémè ncitukù mwambe ne ndi muprofeta to.”

81 Yèyè ne: “Bóbò's bàtù bàkwangata mushindu awu. Ikàlàku ubàlongesha mwa kupeta mapà a Nyuma ne bwa kwenza cintu kampanda's. S'bvwa bìkèngela bwa wèwè kwikalakù ubàlongesha bintu bya bujitu, bintu binène.”

82 Mémè ne: “Mmunyì mùndì mwa kubàlongesha makumi makole pàdìbo kabàyi nansha baswe kulonga ABC, mwa kwikala ne nsombelu wa kaneemu pa bwalu abu? Neucyènzè munyì? Eyowa's, anjì pwekà ku cintu cya kumpala aci.”

83 Ku cidimu ne ku cidimu, pàndì nkòsolola ditunga, bidì byènda bibiipa anu kubiipa díbà dyònsò. Kùdi cintu kaciyi

cyènda bîmpè mwaba kampanda to, kî ncilèmà cya Diyî to. Kabyèna bikèmesha to mutùdî katùyikù tupeta midilu ya ditàbuluja yîteema. Bidi bitùkèngela cikondo cya disukula dya nzubu. Nzambi kààkwenzakù aci to patùdî katùyî twalukila cyakabidi. Bidi bitùkèngela cikondo cya disukula dya nzubu.

⁸⁴ Ne wêwè mulume peebe, udi muswe kulekela mukàjèèbè wènza cintu cya mushindu awu, ùvwàla kaputulu! Abu kî mba-Méthodistes, anyî ba-Baptistes to. S'mbeena Mpenta, s'ncya bushuwa, “cimwènekeli cya difwànà dya Nzambi, Cikondo cya Ekeleeziya wa Laòdikiyà, wa civùmvù,” Mpenta ku dînà, ki cyònsò cidiku. Mpenta kî ndînà to, ndilabula dya dibàtiiza dya Nyuma Mwîmpè, didî disukulà bantu dibàshiya anu zeezeze. Kabyèna bikèmesha to mutùdî katùyî tupeta masangisha manene a dyondopa ne bikwabo, kùdi cintu cidî cyendè kabèsà mwaba kampanda. N'Sàtaanà awu, mutùmòne pambelu biikàle tuteeta bwa . . .

⁸⁵ “Ee, twètù bambe cintu kampanda pa bwalu abu, nebàshintululè buumambàlà bwabò.”

⁸⁶ Vùlukàayi ne, kabàtu bèngeleka beena Kilisto nansha. Beena Kilisto mbakâyàpàle. Bòbò mbalume ne bakaji bàà Nzambi, bàdî bàtwa ku cya Nzambi, cidî nî nganyî nî nganyî mukwabo ne cya kwamba nansha ciikàle cinyi. Kabyèna bikèngela bwa wêwè kubàsèngeleela anyî kubàswishisha, ne kubèèla manànanshi ne kubèngeleka to. Abi mbikùnyibwà bitenteka mu makopo, bisopakaja, byòbî kabitukù ne dikwàcisha to nansha dikese, kabyàkukwàmakù cintu to.

⁸⁷ Cidi cimvùlwija, bu . . . Abidi adi panshi aa neciikàlè cikondo cya dyanza dya maswa. Mwawa mumòne tunyuunyi tukese leelu ewu, kuntu kwàka, mishààmishà ya mikese yàmbula tuubisoosà yikatùtèèka mu maswa àayi. Kabyàkunènga ntàntà mule to kayiyi myenze maswa, myele mayi àayi makese awu bwa kuàtooya. Nudi bamanyè's, kanyuunyi kakese aku kàdi mwa kwikala ne diswa dya mayi, ne kàdi mwa kusòmba pa diswa dya mayi adi, ne kààkùdimuna ndambu yònsò wa tusunsa; kàngata tukàsà twàku tukese atu kààkùdimuna, ne kàsòmbapù. Mpindyewu, kòkò kashiye mayi awu àkwàta mashika, paanyima pàà mamane kukwata luuya, kaàkutooyika to. Ne kàdi kabùuka kàngata cyàkudyà mu kaamwînù amu tente, kààlukilapù cyakabidi.

⁸⁸ Nenuku nudi bamanyè's, kanyuunyi kaamaamù kakole aku, nkafwànyine kusòmba mwaba awu pa mayi awu, ne kuàkùdimuna paanyima pàà tusunsa tubidi twònsò, ne kakàyi . . . kàdi mene mwa kudifila ne kujila byàkudyà mu mushindu wà kàshààla kapeepèle peepeelee bya kakàyikù ne bukole bwa kuumuka mu diswa amu to. Kadi, dîbà adi, kaamaamu kanyuunyi aku kòkò kakàyi kapetàngane ne kanyuunyi kalume to, mayi awu kaàkutooyikakù to. Nansha

bya munyi, nansha wêwè muëngèlèke bishi, kaakutooyikakù to. Neashaalè anu mu diswa amu ne mùdiwu àbola.

⁸⁹ Nenku ní kùvwakù cikondo civwà cikèngelà bwa Mpenta kupetanganaye ne Mulume, Yesu Kilisto; bwalu nyewu tudì munkaci mwa kupeta anu diswa dyùle tente ne mayi mabole, biikàle bavila Diitabuuja, babwela mu Nsangilu wa Bukwântèndeleele, ne biinyike ciine aci ne mmaalu manene, bwa kusòmba ku luseke lwà paapà, ne kwamba ne “mbya nyuma.” Cidi kacyi cyènda bîmpè ne bàà pa buloba ncinyi’s, nwènù beena Mpenta? Kanwènaayikù bamanyè ne Bible ùtu mwambe ne bintu abi bivwa ne cya kwenzeka anyi? Kadi twètù tudì tutuuta mikòbolo bwalu ba-Méthodistes ne ba-Baptistes bàdi bàbwelamù, ne pashiishe bintu bikwabo byònsò ebi mushindu awu. Kanwènakù bamanyè ne pàkaavwà baavirgo bakùtàkàne bàlwa bwa kusùmba Maanyi, ki dîbà adi mene dyàkalwà Mubàki anyi? Ne bôbò kabààkapeta Maanyi awu to! Nudi bamanyè’s, Dyambwibwa nedilwe mu musokoko wà menemene, ne diya, àmwè a ku mēbà aa, mu mushindu wà ne kanwàkumanya nansha ne ndyenzèke to. Nedùikalè dimanè kuya, ne nenùdikonkè cidi cyenzèke.

⁹⁰ Anu mwàkalwà Yone pa buloba. Ki kuMwambilabò, ne: “Ee, Bible’s mmwambe ne Eliyà ùdi ne cya kwanji kulwa dyambedi.” KwambaYe ne: “Ùkaadi mumane kulwa, kadi nwènù kanùvwa bamanyè to.”

⁹¹ Ki mwikalàbi kabidi, dîngà dituku, nebàmbè ne: “Pàanyi’s mvwa ngeela meeji ne bivwa bikèngela bwa eci kwenzekaci kumpala kwa cikondo cya Dikènga dinene. Mvwa ngeela meeji ne bivwa bikèngela Dyambwibwa kwenzekadi.” Méyi awu mmawànyine kwalukila ne: “Dikaadi dimanè kwenzeka kadi wêwè kùvwa mumanye to.” Uh-huh. Dîbà dîdi mwa kwikala dikaadi dipite kutàmba munùdi nwènù nwela meeji amu. Kaa, tàbulukàayi, nwènù ekeleeziya! Mbîmpè bu mēmè mwa kushiya aci; ncyènàku muvwile dilongesha dya nshindameenu kaaba aka to, ngèdì anu meeji ne mvwakù mufwànyine kutuuta aci bikole bwa nwìkalèku naaci cilama ku luseke.

⁹² Vùlukà, mwaneetu, Sàtaanà wàmònu ndongamu minene eyi, ekeleeziya kampanda ùteeta bwa kutàmba mukwabo, dingumba kampanda diteeta bwa kutàmba dikwabo, dijoomona dipanga dyònsò dya mukanda ne bikèngela bwa kubèela diteeta dya bintu bya mu meeji, kwambila mumanyi mupilùke wa maalu a nsòmbelu bwa kuteetaye muntu kumpala kwa kuyaye mu lwendu mu mudimu wà bwambi. Mpenta’s! To, abu—abu—abu kî mba-Presbytériens to, s’m’Mpenta. Diteeta dya mitu ndilòmbiibwe bwa kasùmbù kampanda kàà beena Mpenta, kasùmbù kanene, kumpala kwa ba-mpandanjila kuyabo mu budimi bwa bwambi.

⁹³ Kadi bu bôbò mwa kubèèla diteeta dya mushindu awu? Bàdi bàbènza diteeta kampanda. S'ki cìvwa diteeta dya mpenta ku cibangidilu, pààkindilábo mu cibambalu cya kuulu too ne mwàkalwà Kapyà kàà ku Dyulu, ne Bukole bwa Nzambi. Ki cìvwa diteeta ncyôci aci.

⁹⁴ Kí mmumanyi mupilùke wa maalu a nsòmbelu wa ngiikàdìlù ya pa buloba, mukwàcìke ndambu wa maalà mwimane pààpa ùteeta bwa kusalulangana mitu, paùdi musalùkekù ndambu, anyì cintu kampanda, wamba ne: “Wèwè kwèna mukùmbànyìne nansha kakese to.” Pàdìbi ne, kakùyì mpatà to mbijaadikìibwe ne muntu wa nyuma wa menemene ùtu ùbinduluka, bìkèngela kwikalayè mu mushindu awu bwa kuMubwelayè. Pa nanku ki bwalu mbwòbù abu, nwamonu's, kadi bàdi anu bànyangakaja bìdì Nzambi muteete bwa kwenza munda mwa bidimu, kadi bàalukila buludi ne yabo ndongamu ne byabo bya binène. . .

⁹⁵ Mbasaluke pàdìbo bà mòna bantu búngì cyanààna basangìle. Bàmba ne: “Ngìkalakù nansha mwa kubàvwija bònso beena Assemblées's wè! Ngìkalakù nansha mwa kubàvwija bònso beena Bumwe's wè! Ngìkalakù nansha mwa kubàvwija bònso ba-Méthodistes's wè!” Méthodiste ùdi ùteeta bwa kubàvwija bònso ba-Méthodistes, Baptiste ùteeta bwa kubàvwija bònso ba-Baptistes, beena Mpenta bàteeta kubàvwija bònso beena Mpenta! Kaa, kwèna ne cyùdi mwa kwenza pa bwalu abu to, Nzambi mmulongolole bôbò abu kacya ku difùkà dya dyulu ne buloba. Tudi ne cya kuyiisha Evanjeeliyo. Kwajiki. Kadi, ndongamu yetu minene ayi, tudi baase lwendu bayè katùyì ne Kapyà aku to. Tudi baase lwendu bayè kadi kudyènzela twètù biine kapyà kàà kadyènzela kumbelu's, mutùdi mwa kwamba.

⁹⁶ Nenku communisme wetù, mpindyewu tudi ne bwòwà bwa dikema, communisme wàbweði: “Cìikalà mwa kwenzeka ncyini?” Kadi, nudi bamanyè's, cintu cinène kí n'communisme to. Lekèlaayi nnwàmbilè aci mpindyewu ne, mèmè ncyèna ne bwòwà bwa communisme to.

⁹⁷ Kadi cìndì naaci bwòwà, nwènù beena Mpenta ncya ne, Nsangilu wa Bukwántèndeleeleu neànwàngàte. Ki cintu ncyôci aci. Necìikalè mwa kwenza cimanyinu cya nyama wa lwonji, ne nebikengelè bwa nwènù kubwelamù. Bwalu nudi bulongolodi, bìkengelè bwa nwènù kubwelamù anyì kupàtukamù. Ki cintu ncyôci aci, ne muntu kanà yònso udi mwìmpè, wa lumvu, wa nyuma mmumanye nanku. Bìdi bitùkèngela bukwapo bujaadiki bwa pa mbù, mutùdi tusangana mpindyewu. Kadi mwena Mpenta wetù twètù ewu, ùdi yèyè anu ùcìmina, kumina ndòbo, nshinga ne cidiidi ne: “Cintu bunènci cìikalàci's wè!” Pàdìbi ne, ba-Méthodistes, ba-Presbytériens, ba-Luthériens, beena église de Dieu, ne beena Mpenta, nebikengelè bwa nwènù kuvila—kuvila dilongesha dyenu dinene dya cìpostòlò adi, bwa nwènù kwikala mwómò amu. Nebikengelè bwa kwenzabo bya mwomumwe. Kanwàkwikala ne cintu nansha cimwe cya

kwenza panwàbwelàmù to. Cyònsò cidi munkaci mwa kukolesha malanda ne Loomò, anu cidi cijaadikiibwe menemene. Mifundu nyìdì myambe nanku.

⁹⁸ Mbwalu kayi ebu's kùdì bayiishi bàdì bàlekela bintu ebi bìbwela mu ngiikàdìlù ewu, kabàyi bàdìmwija bantu? Nzambi neàbàlòmbèci ku byanza byabo. Anu mu cikondo cya lutatu eci, bòbò bàvwa mu lutatu, mmùvwbò. Communisme kí ngudi udijaalamija to; Nsangilu wa Bukwàntèndeleelu ngwìkala mwa kumina musùmbà mujima awu. Nenukù vùlukàayi ne, panùdì nwamba ne: "Kakwàkwenzeka. . ." S'cidi cyènzeke, pashiishe dîbà dikaadi dimane kupita. Nukàadi bamane kupeta cimanyinu cya nyama wa lwonji. Nukàadi bèndè yèyè dîbà adi.

⁹⁹ Bivwa bìmpè nwènù kuya kunùdì mwa kukùpànduka mpindyewu, eyowa's, mukalenge, kutwìbwa citampi mu Bukalenge bwa Nzambi. Mubidi wà Kilisto m'Mubidi musokome wà Kilisto, tudì tubàtijiibwaMu ku Nyuma Mwìmpè; katwèna tubwelaMù ku didilamika, bàtwàngata bàtwèlaMù, bàtùlondela ne tudìMù, tuMùbwela ku dyakula dya mu myakulu, tubwelamù ku dyela dya mbila to. Udi mulediibweMù, ku Nyuma Mwìmpè. Neya bushuwa. Bushuwa's.

¹⁰⁰ Mpindyewu tudì tumòna bintu ebi, lutatu lùjuuka dyàkamwè. Kaa, dyabulu winangila wamba ne: "Uh-huh, mbabwelè mu cyuyùya kampànda, nyawu bàdì kuntu kwàka anu bàtùpika bàya muulu bàalukila, bèèla mbila, bàpicila mu cikondo cya dicyonkomoka. Udi mumanye's, anu patùdì twakulangana apa ki dyànyì dîbà ndyòdì edi dya kubàtùkija mu màyi. Ndi mbàsombwela pàanyi mpindyewu."

¹⁰¹ Ki kubàndilayè pa kakùnà kadi kubanga kupwìdija mupuuya wèndè wà mulungù awu, pù: "Matuku a bishima àkaadi mamane kupita. Byòbì biine, ndi ngeela meeji ne bantu aba bàdì anu babìndùlùke cyanàana. Ngeela meeji ne bivwa bikèngela kubèelabò di—di—diteeta dya mitu kumpala kwa kuyabo ku lwendu lwà bwambi lwà ku baabèndè." Beena Mpenta! Uh-huh. Monaayi mùdì mupùùya wèndè wà mulungù awu wùshebeya Dìyì ne: "Kaa, ngeela meeji ne Cidi ncintu kampanda cikwabo, ndi—ndi ngeela meeji ne cidi. . ." Nwamonu's, bàalukila buludì cyanyima mùdì mangumba makwabo ónsò menzè amu, ki njila udibò bàlonda nyèyè awu menemene. Bòbò nebiikalè, cidi cìcishebeya. Pa dîbà mene dinùdì nucìvwija bulongolodi, aci cidi cìcishebeya. Mmùkaadici cyenzè misangu yònsò. Ki mwènzàci misangu yònsò. Kacyadyàkujuukakù cyakabidi to. Kacya kacitukù cimanyiiibwe mu maalu-malonda nansha. Mu—mu Cikondo eci cya Ekeleeziya wa Laòdikiya, Kilisto ùvwa pambelu pàa ekeleeziya, ùkookola, ùteeta bwa kubwela. Ne bòbò kabèèna anu mwa kuCìtwàlakù to. Kabèèna mwa kuCìtèèlejakù to. Mpindyewu tudì tusangana ne, mu dîbà ditùdì ne mwoyi edi, lutatu ndubwele.

102 Ne pashiishe tudi babangè kusangana ne, bishima kabicyèna kabidi byènzeka, mùvwàbi byènzeka amu to. Babeedi bàdi bààlukila mu mààbò bàsaama. Kí ncilèmà cya Nzambi to. Mbwa kupanga kwa ditàbuluja munkaci mwa bantu. Kakwèna ditàbuluja nansha dimwe to. Bàdì—bàdi bàsòmba bàtèeleja; bààlukila mu mààbò, bàmba ne: “Ee, ngeela meeji ne aci civwakù anu cimpè’s. Uh-huh.” Nwamonu’s, kakwèna lukunukunu alu to. Kakwèna cintu aci munda mwa bantu civwà cikèngelà kwikalàmù aci to.

103 Ndi mvùluka ne kùkaadi bidimu dikumi ne bitaanu, mu Arkansas emu, pàmvwà ngenza kaadisangisha kakese mu Jonesboro mwàmwa, pàvwà bantu batwè ku binunu makumi anaayi bàteeta bwa kubwelamù, balwè mu cimenga cya bantu bu binunu dikumi ne bitaanu nanku. Ne bàvwà bàlààla mwinshi mwa màshinyì a dyambula naawu ndàndà ne bikwabo byònsò, ne bakwàte mabeji bwa kubwikila bàna bààbò balela bàvwà babeedi abu, anu bwa kubwela munda. Bàvwà bàsòmba mu nkwsa yabo kabàyi bàswa kuumukamù to, muunya ne bufuku, ne bàtuma bananga bààbò bwa kuya kabàkèbela màmpà meela minyiinyi ne mulàngì wà—wà soda; ne bàshààla mwaba awu, ku dituku ne ku dituku, ku dituku ne ku dituku. Myoyi yabo yìvwà kuulukuulu, yilàkuka kapyà. Anu kantu kakese cyanàànà kàvwà Nzambi wènta, kàvwà kabàlàkusha kapyà. Ne bóbò abu nkama ne nkama bààkabwela munda amu.

104 Yèyè ùcidi anu Nzambi umwèumwè awu, dilòlòlò edi, uvwaYè kùkaadi bidimu dikumi ne bitaanu awu. Ùcidi anu Nzambi umwèumwè awu, dilòlòlò edi, uvwaYè pààkafùkàYe maulu ne buloba apu.

105 Kadi bwalu bùdi cinyi? Tudi balwè kusaluka bikole ne baswè bwa kwasa etu malongolodi, baswè kwasa *cikampanda*, ne kwasa *cikansanga*, ne kwenza cintu kampanda cya cinène ne cibàlakana, bwa kudipàlakaja ne ba-Jones, ne ba-Méthodistes, ne ba-Baptistes, ne ba-Presbytériens. Nwènu kanwèna bàà ku bóbò abu to. To, kí ncinùdi to. Bóbò mbantu bàà cyenamangumba, cidi anu cilenga’s, katwèna naabo cilumbù to. Kùdi beena Kilisto balenga bùngì cyanàànà munkaci mwabo amu, kadi kabìwva bikèngela bwa nwènu kuswikakana mu bisumbù bya beena bupidya abi to. “Bantu bàdi bàvila Bukole bwàdi,” kabyèna bikèngela bwa nwènu kwangata luseke lwabo to.

106 Nudi bamanyè’s, lutatu mu bwalu abu lùdi ne, nudi nuteeta bwa kubweja Hollyhood mu ekeleeziya. Cintu civwà cikèngelà bwa nwènu kuteeta bwa kwenza nkupàtula Hollywood mu ekeleeziya. Nwamonu anyi? Nudi nuteeta bwa kuvwija citanda cyenu cilenga menemene, nudi nuteeta bwa kuvwija dingumba dyenu dinene bikole menemene, mu mushindu wa dikòka ntema ya bantu. Twètù kí mbàdi mwa kusambuluka kuya luseke lwabo bóbò to. Bikèngela tùbàkòkè bóbò ku lwetu luseke. Bintu byònsò bìdi bikenkà abi, vùlukààyi ne, Hollywood ùdi wèngelela

ne ngiikàdilù wa pa buloba, pàdìbi ne Evanjeeliyo ùdi wèla nsèsà mu didipwekesha. Kùdi dishiilangana dinene pankaci pàà kukenka ne kwela nsèsà. Evanjeeliyo ùdi wèla nsèsà mu didipwekesha, ne bupole, ne didipwekesha, ne bukole. Pàdìbi ne, Hollywood ùdi ùkenka, ne bantu bònsò bàdi bèèla bibingu bya disanka ne bàtuuta mikòbolo, ne bàyakù. Nwamonu anyi? Katwena twètù dijinga ne abi to.

¹⁰⁷ Tudi twètù baswè kwikala ne nsòmbelu wa Bukènkè bwa mushindu ewu. Yèyè mmwambe ne: “Nudi mukèlè wa mu buloba.” “Mukèlè wòwù mujimije ditwà dyàwù,” ki bukole bwàwù mu Evanjeeliyo mbwòbù abu. Bivwa bikèngela twètù kwikalakù ne cintu kampanda cikwàta mudimu mu ekeleeziya yetu, mu mushindu wà ne ba-Méthodistes, ba-Baptistes, ba-Presbytériens, ne bònsò abu, bafwànyìne kujinga kulwa. Bivwa bikèngela twètù kwikalakù batwè mukèlè bikole’s! Mukèlè wùtu wùfila nyoota, wùjuula nyoota. Mukèlè nditwà adi, pàdiku dilengangana. Bikèngela kwikalè dilengangana.

¹⁰⁸ Ne tudi tusangana ne, byuyüyà byetu binèné bidi bìteeta kudipàlakaja ne ba-Méthodistes ne ba-Baptistes, ku bitanda binèné ne myaba minene, ne bantu balenga balongè tulaasa, ne bilongelu bitàmbe bunene ne bilongelu bitùmbùke bitàmbe bunene, ne bintu byònsò mushindu awu. Tudi bayè bipapù bakabwelè mu cyuyüyà kampànda, kadi’s ki lutatu lwàbwèdi elu.

¹⁰⁹ Kadi meeji a nyuma àdi àtàngila eku ne eku àmba ne: “Mona, anjì indilaayi kakese mwab’ewu, nebikengelè bwa twètù bònsò kubwela mu Nsangilu wa Bukwántèndeleele awu anyi? Cisùmbù cyetu cijimà necibwelèmu anyi?” Bushuwa’s, s’nenùbwelèmu. Ciyi’s mmenemene. Tàngilàayi nùmonè ní kanwàkubwelamù. Bible mmwambe ne nenùbwelèmu, menemene, ne Kilisto úwva ne cya kusanganyibwa pambelu. Ngondo’s wàkafiika fitùtu kumpala kwa paapà (wa kumpala wa kuyakù ku Loomò awu), dilòòlò adi, ciikàlè cinùleeja cimanyinu mu maulu. Kacyi cidyanjila kwamba to, wàkafiika’s. Mushindu mwine wùdi Mukalenge wènza bintu mu dituku edi’s wè, bilenga bilayà!

¹¹⁰ Dìbà adi mu dituku dinene dya mìdimà edi, pàvwàbo kuntwaku, bipeepèlè kjuukabi. Ditekemena dyònsò dya kupànduka dikaavwa diyè. Mpindyewu cinwènza ncinyi bu dingumba dyenu mwa kubwela mu Nsangilu wa Bukwántèndeleele awu? Ncinyi ciikalà mwa kwenzekela bintu byetu byònsò binèné bitùdi twibaka pa buloba apa ebi, ditèkemena dya ndekeelu dimanè kuya?

¹¹¹ Kadi nudi bamanyè’s, pakààvwàbo anu pabwìpì ne kwela mbila, ne ditèkemena dyònsò dimanè kuya, kabàvwa mwa kusungidiibwa to; kadi dyàkàmwè, kuMumonabo ùlwa, wènda wèndela pa màyi. Mu dìbà dya mìdimà, kulwaYe, wènda ùbwela.

112 Nudi bamanyè mùdì bwalu anyi? PààkabàshiyàYe apu, Ùvwa mumanye ne cyôci aci necyenzekè, pa nanku kubàndaYe ku kakùnà kàà katàmbe kutumbuka kàvwàku mu citùpà cya buloba aci. Paùdì utàmba kubànda, mpaùdì utàmba kumòna kule. Ki kubàndaYe kuulu bwa kwikalaYe ùbàtàngila, nudi bamanyè's.

113 Nenukù Yèyè ùvwa mumanye ne bwalu abu bùvwa bùlwa. Yèyè mmudyànjlile kwamba ne dituku edi nediikalèku. “Anu mwàkadìbi mu matuku a Sodomà, ki mwikalàbi kabidi ku dilwa dya Mwànà wa muntu, piikalà Mwànà wa muntu munkaci mwa kubuludiibwa.” Dìbà adi, Mwànà udi ne cya kubuludiibwa. Lukòngò lwà beena lwonji ne beena masandi elu nelwikalè lwènda lùkèbangana ne cimanyinu. Nelùpetè cimanyinu. Nelùcibèngè anu mwàkacibèngàbo musangu awu amu, kadi neciikalè cimanyinu cya dibùikà dya ku lufu. Yèyè ùcidi anu ne mwoyi, wèntza mwàkenzàYe amu.

114 Tudi tusangana ne, mu dìbà dikole edi, bayiidi abu bônso mu dikenga, Yèyè wàkabànda kuulu bwa kumònaYe mwa kubàtàngila. Yèyè ùvwa musòmbe kuntwaku pa kakùnà, munkaci mwa kubàtàngila.

115 Kadi ewu musangu Yèyè kí mmubànde pa mukùnà to, kadi Yèyè mmubànde mupàtùke mu lukita, mubànde mupicile mu mpeepèlè, kupita ngondo, mitooto, too ne mwàkabàndàYe muulu menemene mu mushindu wà ne bikaadi bikèngela bwa kutàngilaYe mwiname panshi bwa kumòna Dyulu. Ne pòpò apu mpàdìYe musòmbe, mu Dyulu. Mpindyewu dísù Dyèndè didi pa nyuunyi wa mushààmushà, ne ndi mumanye ne Yèyè ùdi ùtùtàngila. Ùdi ùtàngila.

116 Nenukù apa mene mu dìbà dya mîdimà edi, pàkaadi ekeleeziya mikabwele mu ndongamu minene apa, ne pàkaadiyi ne ndongamu *kampanda* ne ndongamu *kansanga* apa, yònsò ayi milongolola anu mùdì ekeleeziya mikwabo yònsò emu, mangumba. Kadi ncinyi cidi cyenzèke? Mu dìbà dya mîdimà, pàdì bantu balelela bàà nyuma bàdikonka ne: “Ciikalà mwa kwenzeka ncinyi? Tàngilàayi bàna bàànyi!” Mulume wàmba ne: “Tàngilàayi mukàjàanyi! Tàngilàayi *cikampanda!*”

117 Kadi bàdi bàkòsoloja disangisha dya milombo dya mu dyalumingu, anyi dya mu diisàtù dilòlò's wè, kumpala kwa dìbà, bwa kumònabò mwa kuya kabandila *Tudi Banangè Sucy*, anyi cintu kampanda cya mushindu awu, ku télévision. “Banangi bàà maalu a pa buloba, kutàmba kwikala banangi bàà Nzambi.” Bèntza maalu bu bóbò abu.

118 Ngàkambila inàbànza kampanda dituku adi, ùvwa muvwàle nkanzu mumwonyè bikole. Mémè kwamba ne: “Mwaneetu wa bakaji, awu nkanzu's mmukwonyè bikole be. Kabyèna mwa kuumvwika bìmpè bwa mémè nkwambila cyôci aci to, kadi mmukwonyè bikole. Wèwè udi mwena Kilisto, nenukù udi mufwànyine kwikala dibwe dya cilendwishi.”

119 Kwambaye ne: “Ee, Mwaneetu Branham, udi mumanye anyi?” Yèyè ne: “Ewu’s ki mushindu wumwepele wùdibo bènza.”

120 Mémè ne: “S’bàcìdi bàsùmbisha bilàmbà, ne bàdi ne màshinyi a bilàmbà. Kakwèna pàà kumbingila to.” Eyowa.

121 Tèèlejà, lekela nkwambileku cintu kampanda, wèwè mulunda wanyì munanga. Kî nne ndi nsùminyìnangana neebe to. To, mukalenge. Ndi nteeta bwa kukulama pambelu pàà mwaba wà dikengeshiibwa awu. Pàcìdi anu nyuma awu munda mwebe, wèwè neucyènzè anu kucyènza. Ncya bushuwa. Bikèngela ùpatukèmu ku dilediibwa. Mpindyewu udi mwa kwela màmfù bwa dīyī adi, kadi lekela nkwambilèku cintu kampanda, wamònu’s: “Cìdi mwoyi wèbè aci, ki kùdi kabidi bubanji bwebe.”

122 Lekela nkwambile. Udi mufwànyīne kwikala mukezuke kèzùù kùdi bàyeebè, ne udi anu mufwànyīne kwikala mukezuke kezukezu mùdì cilòngò cya mbata, wèwè nsongàakàjì, kùdì mubangila webè, kadi dīngà dituku Nzambi neàkulumbùlwishe bwa dyenda dya masandi. Udi mupīile paùdì uvwàla mushindu awu apu. Yesu mmwambe ne: “Ewu yònsò udi utàngila muntu mukaji bwa kumwalakana, yèyè ùkaadi mumane kwenda nendè masandi munda mwa mwoyi wèndè.” Ne pīikalà mulume awu ne cya kulumbulula, ngènzàmpèkààtù awu, bwa dikutàngila, bwa dyenda dya masandi, nganyì uvwa mumuzànjikileci? Elàngànàpu meeji. Nwènu bakaji beena Mpenta, bundu bwenu! Nwamonu anyi? Bundu bwenu!

123 Ndi munùnangè, ki bwa cinyì ndi ngamba nanku. Dinangà ditu dilongolola bilèma.

124 Tudi bambùle mbinga bakabwelè mu cyuyūyà cinène, cyuyūyà cinène cya mvwàdilu. Bidi anu bu ne, mbalondè dikàsà bu bàà pa buloba. Yèyè mmwambe ne: “Kanùnangi maalu a pa buloba, anyi bintu bya pa buloba to; wèwè mubìnangè, dinanga dya Nzambi kadyèna mene munda mwebe to,” nansha wèwè wakula mu myakulu munyì, utùpika uya muulu walukila, ujà maja, ukòsa nsuki, uvwàla nkanzu ya mushindu awu. Wèwè mulume pèèbè ucyànyisha. Mamuma èbè wèwè mwine’s àdi àkwambila mwaba wùdì. S’ncya bushuwa menemene. Kabyèna bikèmesha to mutùdì mu cimvundù cinène bu mutùdì emu, ne mpeepèlè ya communisme, mpeepèlè ya cyena ekeleeziya, mpeepèlè ya bulongolodi bwa bukwàntèndeleeu!

125 Cìdi—cìdi ncikondo cya dikadilàmika, cikondo cya didìsanga. Bisangilu bidì bisangangana mu tusùmbù twa beena mudimu, bàkòkangana pa biine abi. Matùngà àdi ne—ne Matùngà Masanga, àdi munkaci mwa kudisanga. Ekeleeziya yìdi munkaci mwa kudisanga. Byònsò abi bidi bileeja cinyì? Bidi bileeja ne Kilisto ne Mukaji—musela bàkaadi pa kudisanga. Ki cidibi byàmba. Mindidimbi yònsò ya bintu eyi yìdi yileeja cintu

ciine munkaci mwa kulwa. Tàngilààyi mpindyewu patùkaadi tujikija apa, bwalu díbà dikaadi dyènda dimpita bikole.

126 Kadi mpindyewu monaayi, mu díbà adi òvwà ditèkemena dyònsò diyè, dya dipànduka, kumònabò Muntu kampanda ùlwa, wènda wèndela pa màyi, wènda ùlwa kùdibo. Nenku cintu ciine, luseke lùdì lwènza dibungama, tèlajààyi ne ntema, cintu cimwepele cìvwà mwa kubàmbulwisha, ki cìvwàbò naaci bwòwà's. Bààkamba ne: "Cidi ne mmwènekeli wa mukishi. Ncìfwànyine kwikala, nudi bamanyè's, mukishi."

127 Aci's ncyenzèke cyakabidi's! Bòbò bàdi naaCi bwòwà. Bàdi ne bwòwà bwa lubùkù, bàdi ne bwòwà bwa bukole kampanda bwa dyabulu; pààbì's Yesu mmwambe ne Cìvwa mwa kwenzeka mu dituku edi. Cintu cimwepele cìdì mwa kubàmbulwisha's n'Yesu Kilisto. Kì ndikwabo dingumba to, kì ngònsò awu masanga pamwe to; abi nebiikàlè anu mwa kubìipisha bwalu kutàmba ne kwònsò eku. Cintu cimwepele cìdì mwa kunwàmbulwishakù n'Yesu Kilisto.

128 Kadi pààbì's Yèyè wàkalaya bwa kwalukila mu matuku a ndekeelu, mu mmwènekeli ewu, bwa kwenza cyòcì eci, mwikàle ùlaya (anu mùvwàbì kumpala kwa mwànà mulaya kwalukilaye kùdì Abraham, dimiinu dya kumpala adi) dimiinu dya bukalenge dya Abraham, Yesu ùvwa mwa . . . mmwambe ne òvwà mwa kumòna cintu cimwecimwe aci. Kumpala kwa Mwànà mulaya, Nzambi ùvwa mwa kuDimwènesha mu mubidi ne kwenza anu menemene mwàkenzà Yesu, mwàkambàYe ne Ùvwa mwa kwenza amu, anu mwàkambiibwàbì ne bìvwa mwa kwenjiibwa mu matuku a ndekeelu. Nenku mwab'ewu milayi yònsò ayi, yitùvwà mwa kwadija patòòke, makumi ne makumi, mwab'ewu mene kumpala kwenu, bwa ne eci ncìdì ne cya kwenzeka.

129 Kadi ekeleeziya, yòyi mene yìvwà ne cya kwikala ne maboko moolola, bwa kuCyàkidila ayi: "Mémè ndi naaCi bwòwà ndambu. Kì nCya mu cyetu cisùmbù to, nwamonu's." Nenku bàdi naaCi bwòwà. Cintu cimwepele cìdiku mwa kubàfikisha kùdì Kilisto aci, s'ki Kilisto Yèyè mwine, kadi bòbò bàdi bàciina ne nkwèpi kwàlwàCi kubènza bwòwà. "Kaa, ncyèna mumanye. Aci's ncìfwànyine kwikala cya mukishi, udi umòna's. Ne mémè ncyèna muCimanyè to." Biikàle bwòwà ne cintu cimwepele cìdì mwa kubàmbulwisha aci's.

130 Nenku mu díbà dya mîdimà dya dikenga adi, ekeleeziya misungula ayi, kasùmbù kàdi kàsanganyibwà pààpa nàka kàka, ne bwòwà bwa ne ncìfwànyine kwikala mukishi, kabàvwa baswè kwikala naaci bwalu to. Pashiishe kulwakù Díyi dibwengètèke adi ne: "Kanùcìinyi to. M'Mémè."

131 Yèyè ùdi Díyi, kì mmwòmò anyi? [Disangisha didi dyàmba ne: "Amen."—Muf.] Yèyè kàtukù ùshintuluka to, ku diikala Díyi. Mpindyewu kanwènaayikù mwa kuumvwa Díyi dilòlòlò edi,

dyàmbe ne: “Yèyè ùdi umwèumwè awu makeelela, leelu, too ne kashidi. Kanùciinyi to; m’Mémè” anyi? [“Amen.”]

Twinyikaayi mitu.

¹³² Taatù wa mu Dyulu, dilòòlò edi—edi dìdi ne luuya lukole. Mébà ngàà mîdimà, mùdì Kapyà kuumùke ku cyoshelu. Wèwè udi munkaci mwa kupumbulula mu budimi bujimà. Udi mwambe ne: “Bukalenge mbufwànàngàne ne muntu wàkangata bukòndò e kuya ku mbù, kubùkùpayè mu màyi, ne kubùkòkelàyè ku mukùnà. Bukalenge bùvwa bufwànàngàne ne cyòci aci.” Mukalenge Nzambi, dîngà dituku mushipa wà ndekeelu wùdì mu màyi amu awu! Wèwè wàkamba ne: “Bààkakwàta bya mishindu ne mishindu.” Bukòndò bwa Evanjeeliyo abu bùdì bùkwàta bya mishindu yònsò; bwàkakwàta nkùvù, nshishà, ntànda, nyoka, mishipa ya cidy’à bibolè. Twètù katwena bamanyè cidibu bùkwàta to, kadi mùvwa mishipa muntwamu yÛrwà wenda ukèbangana naayi. Wèwè ng’Udi Mulumbulwishi. Kadi tudi bamanyè ne, ne lubilu lwònsò nkùvù, lushishà, ne byònsò abi, bidi byàlukila cyakabidi ku mulundu, byàlukila mu màyi amu. Kadi dîngà dituku mushipa wà ndekeelu wùdì mulongolola, mudyànjila kulongolola bwa kulwawu awu, citùpà cya ndekeelu cya Mubidi aci, necyùmushiibwè mu dijiba adi.

¹³³ Wèwè wàkakùpa bukòndò mu matuku a Luther, ne a Wesley, a Alexandre Campbell, a John Smith, a Calvin, a Knox, a Finney, a Sankey, ne a bakwabo; mu cikondo cya Mpenta, matuku a F. F. Bosworth, ne Frochman, bantu banene abu. Wèwè wàkakùpa makòndò, mu matuku a Billy Sunday, mu cikondo cijimà aci.

¹³⁴ Ne mpindyewu Uçidi anu usaasuluja mu mbù mwònsò. Kùdikù umwe wa kùdìbo musòmbè kaaba aka dilòòlò edi anyi, Mukalenge? Yèyemù, swaku ìkalèku bu mukaji mukese wa ku ciinà cya màyi awu. Nansha mu ngiikadilù wendè wa ndumbà awu, wàkajingulula ne Wèwè uvwa Maasiyà. Yèyè wàkamòna cimanyinu aci. Kujikakù. Kwambaye ne: “Ndi njingulula ne Wèwè udi muprofeta.” Kàvwakù ne cingènyingenyi cya ne cìvwa cìfwànyine kwikala Maasiyà to. Kwambaye ne: “Twètù tudi bindilè Maasiyà,” mu ngaakwilù mukwabo. “Tudi bamanyè ne pààlwà Maasiyà, Yèyè neàtwàmbilè bintu ebi.” Ne Wèwè wàkamba ne: “Mémè ki Yèyè awu.” Aci kukòsaci bwalu.

¹³⁵ Mpindyewu, dilòòlò edi, Mukalenge, enzàku bwa bàmonè ne: “M’Mémè; kanùciinyi to. Mmulayì Wànyì.” Ondòpàku babeedi, Mukalenge, sùngilàku bajimìne, ujàku bàdì munda mutupù.

¹³⁶ Swàku bwa tùumukè dilòòlò edi, biikàle twamba munda mwa myoyi yetu, patùdì twenda tuya apu, bu aba bàvwà bàfuma ku Èmawùsè abu ne: “Myoyi yetu kayivwàkù yilàkuka kapyà munda mwetu pàvwàYe ùtùyiisha dilòòlò edi mu citanda mwàmwa. Bwikadi Bwèndè bwa Nzambi!” Mwàkamanyàbo ne ùvwa ng’Wèwè, bààkaKubiikila bwa kubwela ne mèsù abo àkatàbalà. Swàku bwa yònsò wa kutùdì, dilòòlò edi,

àKubiikilè bwa kubwela. Twètù katùyi tuCyùmvwá to, swáku bwa túKubiikile bwa kubwela, nansha bishi. Ki mushindu wumwepele wúdikú Wêwè mwa kuDìbuulula ngwôwù awu.

¹³⁷ Ne tudi tumòna mushindu wuWàkaDìbuululà paanyima pàà diibiikà Dyebe dya ku lufu, Wàkenza cintu kampanda mu mushindu wumwewumwe wuWàkenzà kumpala kwa dipoopediibwa Dyebe pa nkuruse. Mpindyewu lwáku dilòòlò edí, Mukalenge, Wêwè utu mwambe ne Udi “umwèumwè awu makeelela, leelu, too ne kashidi.” Enzàku cyakabidi, bwetu twètù, muWàkenzà mu matuku aŪvwà mwimane pànu mu mubidi, pa buloba apa. Netwàlukilè mu mèètù, ne myoyi mipeepele, bu bôbô abu. Mu Dîná dya Yesu mmutùdi tulômba. Amen.

¹³⁸ Mpindyewu mu disangisha, dilòòlò edí, ndi mumanye ne kùdi luuya lubi be, ne tucidi ne tusunsa makumi abidi bwa twètù kupàtuka pa díbà. [Katùpà kàà mukaba wà mèyì munda mutupù—Muf.] Ndi . . .

¹³⁹ Ncyèna mwa kwimanyika anyi kupangisha bintu bìndi ngenza to. Ndi musàkiibwe kùdi Cintu kampanda, ntu anu musàkiibwe nanku misangu yònsò, mu nsòmbelu wanyì mujimà, ne Cìtu misangu yònsò anu cya bushuwa. Kacya kaCìtùkù cyanji kungambila cintu nansha cimwe cidi kaciyi mu Bible to. Ncyèna mwa kuciimanyika to. Ncyèna mwa kwenza cintu nansha cimwe pa bwalu abu to. Cìdi anu cicyènza, nansha bishi. Nenku ndi mutwishiiibwe ne, mèmè mutùmikile, kùvwa muntu naaci dijinga. Nenku nêngiikalè ne lulamatu. Nenku mu Dituku adi, ndi muswe, bu mwàkambà Munsantu munene Pòlò ne: “Mashi a muntu nansha umwe kaèna pa byanza byànyì to.” Huhuh. Ndi—ndi muswe kunwàmbila Bulélela. Kí mbu ne ndi . . . Ndi munùnange.

¹⁴⁰ Kadi bu ne wêwè uvwa ne mwànà mukese wa balume . . . Mpindyewu anjì elàngànàpu meeji, inàbànzà, wêwè úngātàndishì katanci aka awu, nwènù bânà beetu bàà bakaji bàdi ne nsuki mibebula ne bikwabo abu. Bu mèmè . . . Bu ne wêwè uvwa ne mwànà mukese wa balume musòmbè mu mùsèèsù mwàmwa, wêwè kwamba ne: “Junior, munanga wanyì, s’mbìmpè ùbwelèku muneemu’s, munanga wanyì. Mbifwànyìne, ncyèna mumanye to, pàmwàpa nebàkwepùkè ne màshinyì’s.” Kwèna munange mwànà awu to. Ncyà bushuwa. Wêwè’s neùpatukè pambelu apu kadi kumulamuna ciseba, anyi kumubweja. S’ncyà bushuwa. Wêwè’s udi mumunange.

¹⁴¹ Ki mushindu wùdì Ewanjeeliyo. Nzambi mmunùnange. “Ne aba bàdiYe munange, Ūdi ùbànyooka ne ùtàndisha mwànà yònsò ulwàlwa kùdiYe.” Nwènù kanùyi mwa kutwala dinyooka to, nuya kule ne nufiika munda bwa bwalu abu, díbà adi nudi bânà balela mu masandi, kanwèna bânà bàà Nzambi to. Pa nanku vùlukàayi anu ne, cidi anu m’Mufundu.

142 Mpindyewu dīyī dya kùdīYe Yēyè, dīyī dimwepele, s'nedīkale ne mushinga kutamba dīndī mēmè mufwānyine kwamba, matuku a mwoyi mùliyō mujimà. N'Yēyè. Tudi bamanyè mulayī Wēndè. Tudi bamanyè cidīYe mulaye bwa kwenza. Mpindyewu ncyēna mumanye ní...mwenzè...ní twīkalakù kuumukila ku... .

143 Mmwabānye cyakabidi twarta anyī? Udi mwabānye twarta leelu anyī? Cīvwa cinyī? J, eyo. Eyo, bwa kulaminyina dībà, tūbangilāāyī anu ku nombā umwe. Mpindyewu, pāmwāpa bàdī mu citanda cijimà emu. J, nombā umwe.

144 Nenku mpindyewu tudi babyēnzè pèètù nanku awu. Tuvwa babangīle, musangu kampanda, ku ewu nunku, pashīshe, mīngà misangu tutwà paanyima tutwà kumpala, ne tunyūnguluka, kadi tudi babīcyōmpākāje pèètu nanku awu kaaba aka. Kadi bantu bōnsò bàdī bābwelà, dituku dyōnsò edi, bàdī ne mpūngà wa kubāndabò kuneeku ne kubwela mu mulongo. Aci kaciyēna cīswa kwamba ne bwalu wēwè udi kaaba aka... .

145 Mbanganyī bàdī bamanyè, mu masangisha aa ne, kùdī bantu būngī bu misangu yībīdī bàdī bondōpīibwe mu batèeleji amu, bu mùdī bàdī bondōpīibwe kuneeku eku? Cya bushuwa, nudi bacimanyè. Nwamonu's, karta kàà disambila kadi anu bwa kufikisha bantu apa cyanāàna, kufikisha Nyuma Mwīmpè munkaci mwabo, bwa munùdī biibīdīle ne kwenza kwa nanku. Kabyēna nansha bīkēngela bwa twètù kwikala naaku mpindyewu mene to. Tudi mwa kulekela bya twarta twa disambila abi.

146 Anu mutwēnjī makeelela dilòlò amu, katùvwakù ne twarta twa disambila makeelela dilòlò awu to. Nyuma Mwīmpè mmuye munkaci mwa aba bāvwà kabāyī ne twarta twa disambila abu. Nenku mēmè kumòna bintu byābūngī bīmvwà nciyīkù mutèèle to, bwalu ncīvwa mumanye ne bīvwa nanku anyī kabīvwa nanku to. Kùcīvwa anu kufīike kumutu kwabo aku, kadi mēmè kubīlekela pāānyī nanku. Ncīvwa mumanye to. Kabīvwa bīfwānyine kwikala ne mushinga bwa kubābīikila to. Cyōnsò cidīYe Yēyè wamba ncīlelela, pa nanku tèelejāāyī cidīYe Yēyè wamba aci.

147 Nanku wambī ne cīvwa n'J? J, nombā umwe? J, nombā umwe. Nganyī udi ne karta kàà disambila aku? Ela cyaanza muulu. Udi ne cya kwikala mutūpākāne's, mwanāānyī; kùdī ne cya kwikala ndambu wa...Kaa, nūmfwīlèku luse. Kaa, mundekeelu menemene ku cimanu paanyimà pāāpa. Bānda kuneeku, inābānzà. S'bādī—bādī bālwa anu ne twarta etu, mwanāānyī wa balume, Mwaneetu Borders anyī Billy, ewu anyī ewu, mīngà misangu bōnsò babīdī, bātu bāzòbakāja twarta atu kumpala kwenu aku, ne pashīshe bākupèèsha keebe karta, cyōnsò cyūdī muswe aci. Twètù katwēna bamanyè to, bàdī anu...Ewu mufwānyine kupeta nombā itaanu, wāwa nāka

ùpeta nomba mwandamutekete, ewu ùpeta nomba dikumi ne itaanu, ne wàwa nàka makumi citeema ne itaanu, kadi twètù katùyi bamanyè to. Ne pashìishe, kabidi, pândi mfika, ndi anu, kwònsò kùdici citèekiibwa pa mwoyi wànyì aku, ndi mbiikidila kwòkù aku, nansha kwikàle penyì. Ndi anu . . . Mémè mwambe . . . Míngà misangu ndi mbala búngì bwa bàdi mu mulongo kampanda, ne mbààbanya ku búngì bwa bàdi mu ewu mulongo nenku mpeta dyandamuna. Nwamonu anyi? Ne pashìishe, nciyi ngenza aci to, mona's, ndi anu . . . cyònsò cidi cìmvwilà dyambedi mu meeji aci, ndi mbiikila.

¹⁴⁸ Nomba umwe. J, nomba ibidi. Nomba ibidi, nomba isatu, nomba inaayi, nomba itaanu, nomba isambombo, mwandamutekete, mwandamukulu, citeema, dikumi, bàlwe, nwamonu's. Umwe, ibidi, isatu, inaayi, itaanu, isambombo, mwandamutekete, mwandamukulu, citeema, dikumi. Abi mbìmpè. Ki mushindu ngwòwò awu, lwáyì anu . . . Indila, muntu mmuye njila mukwabo. Mvwa . . . Umwe, ibidi, isatu, inaayi, itaanu, isambombo, mwandamutekete, mwandamukulu, citeema. Neya bushuwa. Mpindyewu, apa, nyèyè ewu, dikumi. Eyo.

¹⁴⁹ Dikumi ne umwe, dikumi ne ibidi, dikumi ne isatu, dikumi ne inaayi, dikumi ne itaanu. Abu mbakwabo bataanu. Umwe, ibidi, isatu, inaayi, itaanu. Bìmpè, abi mbìmpè.

¹⁵⁰ Dikumi ne isambombo, dikumi ne mwandamutekete, dikumi ne mwandamukulu, dikumi ne citeema, makumi abidi. Umwe, ibidi, isatu, inaayi. Ndi mmòna anu banaayi. Makumi abidi, makumi abidi wándàmùnù anyi? Eyo. Mpindyewu, katwèna baswe kwimanyika bantu bapitèpìte búngì musangu wumwe to. Mpindyewu twètù bajikije ne aba nunku, ne dîbà dicikàlekù ndambu, netùkebè bakwabo ndambu. Katwèna tubiikila . . . Pàmwàpa tudi . . .

¹⁵¹ Tùteetààyibì ndambu mukwabo. Tùteetààyibì bakwabo bataanu. Makumi abidi ne umwe too ne ku makumi abidi ne itaanu, mu twa J atu, bàjuukilèku kuulu bu bôbò mwa kuswa. Makumi abidi ne umwe too ne ku makumi abidi ne itaanu. Umwe, babidi, basatu, paanyima lwà mundekeelu mwàmwa, banaayi. Umwe, ibidi, isatu, inaayi, bákumbanyi bataanu. Eyo, mpindyewu twánjàayi kwimanyina anu apu. Kùdi makumi abidi ne bataanu mu mulongo, ne mbeelèle—mbeelèle mulongo lwà kwinshi eku.

¹⁵² Mpindyewu nènnùlombèku dingaanyishila. Swàyì nùmpèeshèku maci . . . Pèèshaayikù Nzambi maci, bwa tusunsa dikumi ne tutaanu, anyì dikumi ne tusambombo tùdi tùlondà etu. Nudikù mwa kwenza nanku anyi? Ne nudikù mwa kwenza nenku anyì, kukàngula myoyi yenu? Mpindyewu vùlukàayi cìngàmbì aci. Kanùcilekèdiku cinùpicila paanyima to, byenzè

bu màyi àmacila pa masàlà a mpaatu, mùdi kasùmwinù kàà kale kàmba. Kanwènjikù nanku to. Twàyi Eci musinga.

¹⁵³ Mémè munwàmbile cintu cidi kaciyi mu Mifundu to, ne mulayi wà díbà edi, nudi benzèjiiibwe bwa kumòngana ne mulongolodi wa ndongamu ewu bwa kulwa kucingambila. Ncya bushuwa. Mémè—mémè ncitu ndongesha cintu cidi kaciyi mu Díyi to. Nenku mémè nshààla anu ne Díyi adi, ne ngamba ne Dídi mshindu awu, ne Nzambi. . . Cidi mu Bible. Mwanjelo wa Mukalenge Yéyè mungambile cintu kampana cya kaciyi mu Bible, kî mmufwànyine kwíkala Mwanjelo wa Mukalenge nansha. Ncya bushuwa. Kacya Yéyè musangu nansha wumwe kàtukù mungambile cintu nansha cimwe cidi kaciyi mu Díyi adi to, ne nwènu nutu numfidila bujaadiki. Kacya Yéyè kàtukù mwanji kwamba cintu nansha cimwe, mu nkama ya binunu ne binunu, ne mu myakulu ya pa buloba, Yéyè kàtukù mwambe cintu nansha cimwe cya mashimi to, anyi mwambe cintu kampana cidi kaciyi cyenzèke to.

¹⁵⁴ Tèèlejàayi. Konkàayi mulongolodi wa ndongamu ne bakwabo bàdi kaaba aka aba. Cinùdi bònsò numòna kaaba aka eci, nduseke lwa kànàkànà lwà cyôci aci. Ncya bushuwa anyi, bânà beetu? [Bânà beetu bàdi bàmba ne: “Ncya bushuwa.”—Muf.] Mona’s, kuntu kwàka, ne mu nsòmbelu wa pàà nkààyaanyi, mùtuYe wàmba ne: “Ndà ku mwaba *kampana*, ùkamòne *cikampana*. Ne *cikampana* necyènzèkè. Ne ambà *cikansanga* apa, lwà *apa* nunku.” Bitu anu bitùngùnùke, díbà dyònsò, nwamonu’s, ku cidimu ne ku cidimu. Bantu mu batèeleji amu bàdi bàmòna tuubintu twà—twà tukese. Kadi mpindyewu bu nwènu mwa kwikalakù mu kaneemu.

¹⁵⁵ Mpindyewu bantu bònsò bàdi mu mulongo wà babeedi ewu, bàdi biimàne apa aba, mbeenyi kùndi anyi? Elàayi byanza muulu panwikalà beenyi kùndi. Eyo. Mbanganyi kunùdi aku, bàdi bamanyè ne mémè ncyèna mumanye bwalu bwenu nansha bumwe? Elàayi byanza muulu. Mpindyewu pàcidi. . . Twasàkidilaayi. Nansha wèwè penyì, ní udi mu cisàsà, mundekeelu mwàmwa ku cimanu, panshi pònsò *apa*, mwaba wònsò wùdi awu. Nèngiikalè mwa . . .

¹⁵⁶ Mpindyewu, eci mbwa bimpè byenu. Eci mbwa dyakalenga dyenu. Nwamonu’s, eci mbwa dyakalenga dyenu.

¹⁵⁷ Mwva mwele meeji ne mwikùlwànyi wa balume nguvwa wakula naanyi awu, kadi kàvwa yéyè to. Ndi ne mwikùlwànyi wa balume mu mwaba kampana muntu emu, dilòòlò edi, ùdi wipacila bule ebu, ne mémè mwva mwele meeji ne m’Paul mwànà. Úvwa misangu yònsò anu wàmba ne nealwe, imanè pa cibumba cya ku cyambilu, àyiishè pa kaaba kàànyi, kadi pèndè kàyi nansha mwanji kukumbaja bidimu bibidi bulubulu to. Ngeela meeji ne mwànà mukese wa balume wàwa ùdi wènda ùkèbangana ne mamwèndè.

158 Pa nanku vùlukàayi ne, ndi nteeta bwa kunwàmbulwisha. Ndi...Nzambi mmumanye nanku. Ndi nteeta bwa kunwàmbulwisha, nwamònu's. Mpindyewu tàngilàayi, ndi muswe bwa nwènù kutuuta dyakalenga adi, Yèyè mulwe cya bushuwa munkaci mwetu.

159 Mpindyewu elàayibi meeji ku bwalu abu, Mupersona wa Yesu Kilisto ùkwàcila mudimu mu mubidi, mwàkalayàYe ne Ùvwa mwa kwenza nanku kundekeelu. Mbanganyi bàdi bamanyè ne Yèyè wàkalaya nanku? [Disangisha didi dyàmba ne: "Amen."—Muf.] Anu mwàkadibi ku Sodomà kwàka, pàvwà Mwanjelo Uvwa mwele nyima, ne...Ùvwa n'Nzambi. Nudi nwitabuuja ne ùvwa n'Nzambi anyi? Mbanganyi bàdi biitabuuja ne ùvwa n'Nzambi? ["Amen."] Bushuwa, mmwòmò. Bible mmwambe ne mmwòmò. Ne Yèyè, Yesu, wàkatèèla bwalu abu. Mpindyewu mònaayi.

160 Mpindyewu nwènù bàdi kanùyì ne karta kàa disambila kunùdì aku, ndi muswe bwa nwènzèku cintu kampana bwanyì mèmè, kwònsò kùdì usanganyiibwa aku. Mpindyewu vùlukàayi ne, bintu ebi, tàngila padìCi cikwambila ne wondòpiibù apu, anyì cidìCi cikwambila bwa wèwè kwenza aci. Tàngilà cidìCi cyàmba aci. Cyòci anu cikwambile, mbwà kukolesha diitabuuja dyebe. Ne pashìshe pàdì diitabuuja dyebe difika mwaba kampana, olòlà anu cyanza witabè Nzambi. Kì mmèmè to, bwalu Taatù wa mu Dyulu mmumanye.

161 Nyewu ntàngila mu mulongo ewu kaaba aka, ncyèna mmòna muntu nansha umwe ùndì mumanye to. Ndi mwa kumòna anu bantu bu babidi anyì basatu mu batèèleji bònsò emu, bàndì mumanye. Kadi ncyèna mumanye bu ne, mpindyewu mene, ndi mwa kwamba, kuleeja nansha umwe to. Ndi mumanye ne Edmund Way ùvwa kaaba aka mu tusunsa tukese emu. Mwawa mwele meeji ne mwawa mumumòne, kadi ngàà—ngàapangìdì . . .

162 Mèmè ncìyi mutùpàkàne to, ndi mmòna cya bushuwa muntu ùndì mumanye, mmulume ne mukàjèndè, ne mwànà mukese wa bakaji, dìnà m'Fritzinger, bàà mu Ohio mwàmwa. Awu nyèye anyì, wèwè udi Mwaneet-. . .—Mwaneetu Fritzinger wàwa anyì? Udi musòmbele bu mu kasumbù kakese kàa bantu kàa mushindu kampana mùdì. . . Bàba m'Waneetu wa balume ne Mwaneetu wa bakaji Fritzinger, bàà mu Ohio, balunda bàanyi.

163 Ne pa kuumusha abu, udi musòmbe paanyima pààpa wàwa, ùdì. . . Ndi mmona ku luseke eku, mmuntu mununu wa wìpacila bidimu makumì citeema ne bibidi, dìnà dyèndè ng'William Dauch. Yèyè ne mukàjèndè. Mukàjèndè ùtu munganga. William Dauch awu, mu Ohio mwàmwa, mmulunda wanyì wa katàpùlà-katèèka. Kì nkwanjì kwenza ntàntà to, yèyè, ùvwa ne bidimu makumì citeema ne cimwe, kupetaye disaamà dya mwoyi mwimane anu menemene, disaamà dya mwoyi, nenku

mukàjèndè kumbiikilayè ku telefone, bwa ndwe dyàkàmwè, ùkaavwa ùpunga ne lufu díbà adi. Nenku pa . . .

164 Yèyè ùtu mulunda wànyì wa pa mwoyi wa dikema. Mémè mu njila bwa kuya kamumòna, mvwa ne mееji àlubakana. Ki mémè kwimana, ne lùmwè lwà ku nkàtà yànyì ya màshinyì lùvwa lukònyàngàle, cívwa cyènda cidya ndundu wànyì awu, ki mémè kubwela mu mpompì kampanda wa túsòloonyì wa Texaco, kupeta kàsòloonyì, nanku kupàtukabò, e kucitàngilabò. Nenku mémè kutàngila muulu, kumona Mwaneetu Dauch wènda wènda ùkòsolola mu ekeleeziya wanyì, ùndabula ku cyanza. Mémè kwamba ne: “Mukalenge àtumbè.” Nenku mémè kwaluja mèsù paanyima mu nunku ewu, ki yèyè udi wenda upweka ne mùsèsù ewu, ne kundabulaye ku cyanza. Mémè kuya kùdiye.

165 Mémè kumonangana ne ngangabuka wèndè, nsongàalùmè wa citende wa beena Yuda, anyì muntu mushindàme, wa beena Yuda. Ki mémè kwamba ne: “Mmulààle bishi, ngangabuka?”

166 Yèyè ne: “Kèna nansha ne mpungà wa kukànkamana to.” Yèyè ne: “Udi ùpuuyakeena ku mbòmbonè.” Yèyè ne: “Mwòmù amu mene mmwàfwilàyè.” Yèyè ne: “Vulukà ne, ùkaadi ne bidimu makumi citeema ne cimwe’s.”

Mémè ne: “Eyowa’s, mukalenge.”

167 Yèyè ne: “Ndìsaamà dya mwoyi mwimane anu menemene. Kakwèna cintu nansha cimwe cidi mwa kwenza to.” Yèyè ne: “Ndyèndè díbà dya kuyaye.”

168 Ki mémè kwamba ne: “Eyowa’s, mukalenge. Kadi, to, yèyè kèna ùyakù to. Kwàjiki.”

169 Mémè kubwela, kwelela cyanza lwà kwinshi kwa ntentà aku. Mémè kwamba ne: “Mwaneetu Dauch, udikù mwa kuntèèleja anyì?” Kubàndulukayè e kuntàngila. Mpindyewu mu bushuwa bwa bwalu, bwa ku dínà dyèndè, yèyè mmwena Allemagne, D-a-u-g-h, kadi mémè ndi ndishindumuna ne Dauch, nwamonu’s. Ki mémè—ki mémè kwelela cyanza lwà kwinshi kwa ntentà aku, mémè kwamba ne: “Udi ungumvwa anyì, Mwaneetu Dauch?”

Yèyè ne: “Eyowa.”

Mémè ne: “Wèwè kwèna uyakù to. Nkàadi mumane kumòna ne kwèna uyakù to.”

170 Lumingu lujimà kuumukila apu, mémè mwimane mu ekeleeziya wanyì, wàkalwa wènda ùkòsolola mu ekeleeziya awu nganyì pìikalàyè kàyi Mwaneetu Dauch! Mvwa mfùma ku disangisha nya ku musulu, ku cafétéria kampanda, bwa kudya. Kadi ndi mwenze anu mpàtuka mu kàshinyì, ne ngenda mbànda ne mùsèsù, ki Mwaneetu Dauch ewu pwàà ne cyanza cyolola. Bikeena-kumona abi kabitukù bìpangila to.

171 Nenku muntu wa bidimu makumi citeema ne cimwe, ne mwikàle ùlonda disangisha ne disangisha dyònsò awu, ùvwa mu Californie. Udikù mwa kwela anu cyanza muulu cyanàna

anyì, Mwaneetu Dauch? musòmbèle mwaba awu, bwa bantu bàmonèku cidì disàlaayi dilelela mpindyewu. Nyèyè ewu, musòmbè anu mwab'ewu mene, nwamònu's, ne bidimu makumi citeema ne cimwe, mwikàle ùlonda disangisha ne disangisha dyònsò. Pàndì ku tabernacle, ùdi wèndesha kàshinyì ntàntà wa kilòmèètà nkama dituku dyònsò, bwa kuntèèleja nyiisha kaadiyiisha kakese, ne wàlukila. Nzambi: “Nekwikalè Bukènkè ku ibaamulòlò.”

¹⁷² Mwva mwambe ne, dituku adi mwva nyiikilangana nendè, mèmè kwamba ne: “Ndi mwa kukwenzelakù cinyì, Mwaneetu Dauch?”

¹⁷³ “Dilomba dimwepele cyanàànà, Mwaneetu Branham. PààlwàYe, ndi muswe bwa ngàyakù Nendè.”

¹⁷⁴ Mèmè ne: “Kùlubakaji meeji to. Aci kaayi ncikujaadikila. Bushuwa.” Mpindyewu, muntu awu mmulwe, mubàtijiibwe, kaa, mubwele ne mupete dibàtiiza dya Nyuma Mwîmpè ne bikwabo byònsò, anu musadidi mulenga wa dikema wa Kilisto.

¹⁷⁵ Mpindyewu nêndombèku bantu bònsò, mu kaneemu kàà menemene, tàngilàayi mu nunku ewu nùsambilè.

¹⁷⁶ Mpindyewu mbanganyì bàdì balongeshi mwab'ewu bàdì bamanyè ne Yèyè ùdi Mwakwidi Munene, mpindyewu mene, udi mwa kulengiibwa kùdi mateketa etu? [Disangisha didi dyamba ne: “Amen.”—Muf.] Ee, piikalàYe umwèumwè awu makeelela, leelu, too ne kashidi, ne Mwakwidi Munene umwèumwè awu, Yèyè's mmufwanyine kwenza maalu mushindu wumwumwè awu. Bidi anu ne, Yèyè, mubidi Wèndè wùdi ku... pa Nkwasa wa butumbi wa Nzambi. Mbanganyì bàdì bamanyè nanku? [“Amen.”] Mubidi wà Yesu wùdi pa Nkwasa wa butumbi wa Nzambi. Kadi Ùdi ùkwàta mudimu ne wètù mubidi bwa kuDimwèneshilamù, anu mwàkalayàYe bwa kwenza amu. “Byenzedi bìndì Mèmè ngenza nenùbyènzè pèènù.”

Nènnùlòmbèku bwa nwènù kusòmba bapùwe, biikàle mu kaneemu, nutàngila, nusambila.

¹⁷⁷ Mpindyewu, Taatù wa mu Dyulu, ngàateeci bwa kwikalakù anu ne kaneemu ku dyànyì pàànyì dimanya, pa bwalu abu. Mpindyewu anu dîyì dimwe cyanàànà dya Kùdi mpindyewu, Mukalenge, ne pashiishe swàku bwa kaaDiyi kakese, katekete aku kàpwekè mu batèèleji emu kàmba ne: “M'Mèmè; kanùciinyì to.” Enzàku nanku, Taatù. Nunku ndi ndilàmbula Kùdi, pamwe ne Diyiisha dyàyiishiibù dilòlò edi edi, ne Diyi Dyebe bwa kushindikiiibwaDì. Kwèna mwenzèjiibwe bwa kucyènza to. Kadi Wèwè muswe kucyènza, anyì Wèwè ucyènza cya bushuwa, mbwalu Udi mucilayè. Ndi ndòmba bwa Wèwè kutwènzela bwalu ebù, mu Dîna dya Yesu. Amen.

¹⁷⁸ Nunku bantu bònsò biikalè mu kaneemu kààbùngì, anu mu kaneemu kààbùngì. Wetwàwu! Mpindyewu ndi nnùpèesha Mifundu patùdi twenda tuya apu. Bu Mukalenge mwa kucyènza,

ncyêna mumanye to. Kadi an- . . . Ne ndi muyiishè mushindu awu, nwamònu's, awu ngumwe mushindu wà dilaabiibwa. Ewu mmúkwabo mushindu pààwù wa dilaabiibwa. Awu wùvwà anu wùbènesha cyanààna. Ewu, anu cintu cimwe cyanààna, wùmusha anu mwoyi wùdì munda mwebe awu.

¹⁷⁹ Mpindyewu inàbànzà awu mmwimane kaaba aka. Ncìtukù mwanjì kumumòna to kacya bàndela. Katwèna bamanyàngàne? Ngeela meeji mmuwàmbì, mu katanci emu ne, ncitu mukumanye to. Nzambi ngudi mukumanye. Yèyè mmummanyè. Udi mumanye ne citùdì biimanyine kaaba aka mpindyewu eci, netwikalè ne cya kucilumbulwila ku Dituku dya Cilumbulwidi anyi? [Mwaneetu wa bakaji awu ùdi wàmba ne: "Amen."—Muf.] Udi mucimanye? Udi mumanye ne citùdì twenza mpindyewu eci, Nzambi neènzè ne tukacilumbùlwilè kwàka anyi? Ngàm̀bì aci anu bwa kiipàcìlà kampanda. Mpindyewu, bu Mukalenge Yesu mwa kumbuulwila cyùdì munkaci mwa dyenza, cidì mu meeji ebe amu aci, anyi cintu cya mushindu awu, udi mufwànyine kuciitabuuja anyi? Udi mufwànyine kwikala ne cya kuciitabuuja, kì mmwòmò anyi? ["Amen."]

¹⁸⁰ Nudi bafwànyine kuciitabuuja kuntwaku anyi, nwènu batèèleji? [Disangisha didi dyàm̀ba ne: "Amen."—Muf.]

¹⁸¹ Mpindyewu tudi biimàne menemene anu mùvwà mukaji wa ku ciinà cya màyi awu, ne Mukalenge wetù, muntu mulume ne muntu mukaji batwilàngàne bwa musangu wàbò wà kumpala. Nwamònu anyi? Ki twètù aba, batwilàngàne bwa . . . Awu n'Yone Munsantu nshapita mwi4. Mpindyewu bu Nyuma Mwimpè mwa kwamba . . . Ní udi apa bwa muntu mukwabo, ní udi usaama, ní ndutatu lwà ku lubànzà, ní ntatu ya mfranga, cyònsò cidìku aci, ncyêna mèmè ne cingenyinyenyi nansha cikese to. Kadi Yèyè ùdi naaci. Kadi Yèyè ngudi mwa kujingulula meeji àdì mu mwoyi wèbè amu. Yèyè ngudi Dìyì. Mèmè ncyêna mwa kucyènta to. Mèmè ndi muntu. Wèwè udi mubìndùlùke ndambu, nenku ki bwa cinyl ndi ngenza cyòci eci, udi umòna's.

¹⁸² Ki lumwe lwà ku ntatu yebe ndwòlò alu, ndibìnduluka. Ncya bushuwa. Ne udi kabidi ne disaamà dya nsùkaadi, ki cikwabo cintu ncyòci aci cidì cikutàcisha. Ncya bushuwa. Ntatu mikòdyàkànàngàne, bintu byàbùngì mbidì anu bitàcisha. Ncya bushuwa anyi? Ní ncyà bushuwò, ela cyanza muulu. Nwamonu anyi? Udi witabuuja ne Yèyè neàkondòpè anyi? [Mwaneetu wa bakaji awu ùdi wàm̀ba ne: "Ndi ngiitabuuja."—Muf.] Udi witabuuja? Mpindyewu, dibìnduluka dyebe ndikèba kùdì bùngì bwa bidimu byebe, wamònu's, kadi mpindyewu abi nebikuumùkè byònsò. Ne ndi ngiitabuuja ne ku diitabuuja netùye ku Kalvariyo, bwa kupeta dyediibwa dya Mashi mu mijilu.

¹⁸³ Mpindyewu, ki cyòci aci menemene cyàkenzàYe. Wàkambila mukaji wa ku ciinà cya màyi awu civwà lutatu lwèndè. Lwèndè

yêyè lùvwa mbalume bûngi cyanàànà. Lwebe wêwè lùvwa cìvwà. . . Ngeela meeji ne lùvwa ndibinduluka, ne bikwabo bintu bibidi anyi bisatu bìdì bikutàcisha. Ncya bushuwa, kî mmwômò anyi? Ncintu cimwecimwe aci.

¹⁸⁴ Mpindyewu, pàakafikàYe kùdì Simonà, Wàkamwambila ne yêyè ùvwa nganyì. Udi witabuuja ne Nzambi ùdi mwa kungambila dînà dyebe anyi? Ncifwànyine kukufikisha ku diitabuuja kabidi bikole anyi? Mmwômò anyi? Mandamu Strong. . . [Mwaneetu wa bakaji awu ùdi wàmba ne: “Stout.”—Muf.] Stout, udi mufwànyine kwitabuuja anyi? Ndààku witabuuje, nenku wêwè. . . Byònsò byàjikì. Amen.

¹⁸⁵ Lwàku. Udi witabuuja anyi? Ndi pàanyì mwenyi kùdì. Ncyèna mukumanye to. Nzambi mmukumanye cya bushuwa. Udi witabuuja ne Yêyè ùdi mwa kumbuulwila cìdì lutatu lwebe anyi? Nenku Yêyè mumbuulwile, dîbà adi Mukalenge Nzambi àbeneshiwbè. Ncya bushuwa anyi? [Mwaneetu wa bakaji awu ùdi wàmba ne: “Eyowa, ncya bushuwa.”—Muf.] Mpindyewu kabyèna—kabyèna bikèngela bwa wêwè kulubakaja meeji to, wamònu’s, awu’s—awu’s n’Yêyè, cyùdì umvwa aci. Eyo. Udi kabidi usaama dinyunguluka dya mutu, unyunguluka mutu, ne ubìnduluka anu bipeepèle nunku. Kabidi udi usaama disaamà dya kalòndò kàà mênnyì, cintu kaciyi cyènda bìmpè ne mucìma, ne udi ne disaamà dya mashi àjika. Ncya bushuwa. Udi ne cintu kampanda. . .

¹⁸⁶ Nkutùngùnùke anu kùmwèka muntu mulume kaaba aka. Udi witabuuja ne Nzambi ùdi mwa kukwondopa anyi? [Mwaneetu wa bakaji awu ùdi wàmba ne: “Eyowa, ndi ngiitabuuja.”—Muf.] Wòndopa kabidi ne bàyeebè, ùmusàngaja anyi? Udi wela meeji ne disaamà dya cifù nedyùmukè, ne yêyè neùmvwè bìmpè anyi? Ki cidiye ùsaama ncyôci aci. Ndààku ùkamutentèkèlè byanza, ùmwambilè nanku awu, nenku nedi—nedimuumukè.

¹⁸⁷ Ndi mwenyi kùdì. Mukalenge Yesu mmutùmanyè bònsò babidi, kî mmwômò anyi? Udi witabuuja ne Nzambi ùdi mwa kukusàngaja anyi? Bu Mukalenge Yesu mwa kumbuulwila cintu cìdì. . . cyùdì. . . cìdì mu mwoyi wèbè amu aci, udi witabuuja ne Yêyè neàkusàngàjè anyi? Udi mupete lutatu kampanda. Udi mupete disaamà dya—dya—dya kanyònga, aci ncintu. Ne cikwabo cintu, ncifikishe kalòndò keebe kàà mênnyì bwa kwikalaku katàpìke mputa, kadi aci ncìdì ngangabuka webè mwambe. Mpindyewu, cikwabo cintu cìdì ne, mbaswe kukupanda bwa cyôci aci. Aci ncya bushuwa menemene. Kî ncya bushuwa anyi? Mpindyewu udi witabuuja ne Yêyè ùdi mwa kucìcinguluka anyi? Wêwè udi wela meeji ne diitabuuja dyebe dìdì mu Yêyè anyi? Mpindyewu udi mumanye ne kî mmêmè udi wenza aci to. Udi witabuuja anyi? Eyo. Ndààku, ne bu muwitàbùuji, bikwenzèkèlè nanku awu.

188 Wêwè ne mêmè katwèna bamanyàngàne to, ngeela meeji. Mukalenge Nzambi mmutùmanyè bônso babidi. Udi witabuuja ne Yêyè ùdi mwa kumbuulwila bintu bìdì bifwànyine kukwambulwisha anyi? [Mwaneetu wa bakaji awu ùdi wàmba ne: “Eyowa, ndi mumanye nanku.”—Muf.] Wêwè, udi witabuuja ne Yêyè neàcyènzè. [“Mutwishìibwe.”] Ndi ngamba. . . “Mutwishìibwe,” abi mbìmpè be. Abi mbilenga be. Mpindyewu udi ne bintu byàbúngì bìdì bikutàcisha, ntatu mikòdyàkànàngàne ne bikwabo búngì cyanààna, ne cintu cyènzè bu lukosù cyùdì kùyi upeta mwa kucìmuna to. Ne udi ubìnduluka bibì be. Ne—ne ciine aci, ncyà bushuwa.

189 Pashìishe, udi ne bujitu pa mwoyi wèbè, ne bujitu abu mbwà muntu kampanda, mbwà mwaneebe wa balume. Ne yêyè ùdi ùpicila mu—mu lutatu, ntatu ya ku lubànzà. Yêyè ne mukàjèndè, bàdì misangu yònsò anu bàkòkangana ne bàtúngunuka. . . ?. . . Ne wêwè udi udyùmvwà mwambule bujitu bwa bwalu abu. Ncyà bushuwa. Mpindyewu itàbùùjà ne mwoyi wèbè wònsò, ne byònsò abi nebilongolokè ne nebyùmukè. Itàbùùjà mpindyewu. Mukalenge àkubènèshè.

190 Wetwàwu, mukalenge! Ndi mwenyi kùdì, ne—ne wêwè udi mwenyi kùndì. Ne byà—byàbangì. . . Bikeena—kumona mpindyewu, ndi mmòna, bìmwèka anu bu ne nzubu mujimà ùdì wènda ùshààla mutòke tòò ne bukènkè, byènzè bu mvùnda wènda ùnyùnguluka’s. Wamònu anyi? Kadi udi witabuuja ne Mukalenge Yesu mmufwànyìnekù kumbuulwila cyùdì mwimànyine mwaba awu aci anyi? Udi witabuuja ne Yêyè mmufwànyine kucyènzà anyi? Mêmè pàanyi, ndi ngiitabuuja nanku. Ndi ngaakula anu neebe cyanààna, bwa kupetangana ne nyuma webè, ng’aci menemene cìndì ncyènzela. Wamònu’s, mêmè ncìtu mukumanye to, pa nanku cìdì ne cya kwikala anu cintu kampanda cìdì cìcyènzà kacìyi mêmè to. Bìkèngela ndyùmùshè mêmè mwine mu njila anu menemene, bwa Àdyènzèlèci Yêyè mwine. Nudi nuumvwà anyi?

191 Mpindyewu, cintu cimwepele, udi usaama dinyùnguluka dya mutu dya diyè ne mwa nàka, ne diine dinyùnguluka dya mutu edi dìdì dyènzeka kùkaadi cikondo kampanda. Ncyà bushuwa. [Mwaneetu wa balume awu ùdi wàmba ne: “Ncyà bushuwa.”—Muf.] Ne diine dinyùnguluka dya mutu adi, ndikufikìshe kabidi ku dipeta dya lwendu lwà mashi a àya lubilu. Ne uvwa mubwele mu kòmà. [“Ncyà bushuwa.”] Ki cyòci. Twàmbè ne, wêwè ewu anyi ukààvwakù muiyishi, anyi udi muiyishi. [“Ki cìndì.”] Mpindyewu udi muiyishi; ngààkumònu mwimane mu cyambilu. Nenku, ikàlà ne diitabuuja kùdì Nzambi, nenku dinyùnguluka dya mutu adi nedikumukè. Bambi bônso bàtu anu ne cyòci aci. Neùmvwè bìmpè. Alùkilà ku cyambilu cyebe, ne tùmikilà Nzambi ne shààla ne lulamatu ku Dìyi adi, Yesu Kilisto.

192 Udi witabuuja ne disaamà dyebe dya nyima adi dyàkuumùkù, paùdi musòmbe mu nkwasu awu ùdi wàmba ne: “Eyowa.”—Muf.] Eyo, mukalenge, nenku tũngunukà anu ne kwenda kuya, wamba ne: “Twasàkidila, Mukalenge.”

193 Lwàku, inábànzà. Wetwàwu! Udi witabuuja ne mèmè ndi musadidi Wendè anyi? [Mwaneetu wa bakaji awu ùdi wàmba ne: “Ndi ngiitabuuja cya bushuwa.”—Muf.] Eyo. Udi witabuuja ne disaamà dya baainábànzà, disaamà dya bânà bakaji adi, nedikumùkè anyi? [“Amen.”] Udi witabuuja? Nanku tũngunukààku, wamba ne: “Twasàkidila, Mukalenge.”

194 Disaamà dya twonyi, disaamà dya nyima, mu nyima webè amu. Udi witabuuja ne Nzambi neàkwondòpè ne neàkusàngàjè, ku byòbì abi anyi? Udi witabuuja ne Yèyè neàkusàngàjè anyi? Eyo, kwàta njila . . . ? . . .

195 Lwàku, inábànzà. Mèmè ndi mwenyi kùdi. Mèmè nciyi mukwambile cintu to, nansha cikese, uvwakù mufwànyine kwitabuuja ne Bwikadi bwa Nzambi bùdi kaaba aka bwa kwondopa babeedi anyi? [Mwaneetu wa bakaji awu ùdi wàmba ne: “Cya bushuwa, ndi nciitabuuja.”—Muf.] Uvwa mufwànyine kwitabuuja anyi? Ee, wèwè witabuuja, disaamà dyebe dya cifù adi . . . Nyewu ngàakwambidi anu dikwambila, wamònu’s. Dyàmanyi—dyàmanyi kuya. Ngàakwambidi, wamònu’s. [“Nzambi twasàkidila! Kaa, twasàkidila, Yesu.”]

196 Wetwàwu, mukalenge! Nzambi ùtu musòmbèle mu mwoyi. Ne mwoyi wèbè mmumwèke kaaba aka mubì, matuku adi pansha aa. Udi witabuuja ne Yèyè neàwùlongòlòlè anyi? Kwàta njila ndàaku ùcitàbùjè. Nzambi àkubènèshè. Itàbùujà; Yèyè neàwùlongòlòlè.

197 Udi ne mutu ùkunyunguluka, cikufikishe ku dipeta dya disaamà dya cifù, cyùjà cya mu cifù. Cìdi cikutàcisha paanyima pàà didya. Udi witabuuja ne byònsò byàyi mpindyewu anyi? Ndà ùkangàtè cya kudya.

198 Mbikole bwa wèwè kujuuka kuulu, nyima mmukutàcishètàcisha bibi be. [Mubeedi awu ùdi wàmba ne: “Eyowa’s, mukalenge.”—Muf.] Kààkukutàcisha kabidi to, wèwè mwitabùujè. Newitabuuje anyi? [“Eyowa’s, mukalenge.”] Eyo, tũngunukà, ne Mukalenge Yesu àkusàngàjèku anu menemene.

199 Cyùdi ubìndulukila nunku nciyini? Tũngunukà anu cyanàànà, wamba ne: “Ncyàkwikala kabidi ne mutu wũnnyunguluka to,” ne kwàkwikala naawu to. Ndà witabuuje. Eyo, mukalenge.

200 Lwàku, inábànzà. Mpindyewu, mukaji mwena Éthiopie awu, ne mulume wa batòòke, anu cintu bu nanku menemene cyàkenzekà mu dituku adi aci, Yesu. Bàvwa ne disungulujangana mùvwàbo naadi mu Sud emu, kadi twètù katùcyèna naadi kabidi to. Yesu wàkabàmbila ne bantu bònsò bàvwa bantu bàà Nzambi.

Kakùvwa dishiilangana to, nwamònu's, mukaji awu nansha mwikàle mwena Yuda anyi mwena Sàmaalèyà.

²⁰¹ Mpindyewu, Nzambi Yèyè kàyi mukwambùlwishe to, abidi mmale asatu mmîpî binyoka abi nebîkucibwîlè panshi. Kadi udi witabuuja ne Yèyè neàkwambùlwîshè, àkusàngajè anyi? Anu mwàkenzà mukaji awu amu, kwàta njila ndààku ùkalondèlè bàà kwenu bintu binènè bìdi Nzambi mukwenzèle. Eyo.

Mpindyewu, nyawu kùdi ngangabuka mupandyanganyi mudilongòlòle bwa kupàtula keelè.

²⁰² Indilà kakese. Kàvwa ng'ewu mukaji to. Mpindyewu, indilà kakese, bantu bônso mu kaneemu mpindyewu. Ûvwa—ùvwa n'Sàtaanà, ùteeta bwa kwenza cintu kampana. S'ki cyòci eci. Cyùjà cya kansere, cyùjà cya kansere, nwènù bônso babidi. Ncya bushuwa. Udi ne cyùjà cya kansere, yèyè ùdi ne cyùjà cya kansere, ne démon awu wèla mukwèndè lubila lukole bwa kulwa kumwambulwishayè. Kadi Nyuma Mwîmpè pèndè, ùdi wèla lubila lukole. Nganyi uwikalà mwa kwitabuuja, Yèyè anyi? Eyo. Juuka mu kalààlù aku, wèwè inábànzà. Juuka mu kalààlù kàà dyambwila babeedi aku. Juuka muntwamu, wìtabuuje. Ndààku, Mwitàbùùjè mpindyewu. Amen.

²⁰³ Nudi nwitabuuja anyi? Bintu byônso bìdi mwa kwenzeka. Nudi nwitabuuja anyi? Kadi bìshi nwènù bàdi mu batèèleji amu abu? [Disangisha ne aba bàdi bàfùma ku dyondopiibwa bônso bàdi bàcyònkomoka—Muf.]

²⁰⁴ Tùjuukilàayi kuulu mpidyewu mene. Mpindyewu mene ki díbà dya kucyènza. Muntu yônso . . . Nzambi ànùbènèshè. Muntu yônso àjuukilè kuulu mpidyewu mene. Pèèshaayi Nzambi butumbi. Elàayi byanza muulu.

²⁰⁵ Twasàkidila, Mukalenge Yesu! Tudi tuKutùmbisha bwa bunene Bwebe, ne dyondopa Dyebe bwa babeedi. [Disangisha didi dìcyònkomoka—Muf.]



BUJAADIKI PA MBÛ LUA64-0307

(A Testimony On The Sea)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo dilòlò, mu matuku 7 a ngondo wa mwisâtù, cidimu cya 1964, ku Soul's Harbor Temple mu Dallas, Texas, U.S.A. Ndyumusha pa mukaba wa mêyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org